

六一題跋一





跋題一六

(一)

撰修陽歐

六一題跋

目錄

卷之一

古敦銘

韓城鼎銘

商雒鼎銘

古器銘

同前

終南古敦銘

叔高父鬻簋銘

周穆王刻石

敦匣銘

敦医銘

張仲器銘

石鼓文

秦度量銘

秦昭和鍾銘

秦祀巫咸神文

之果山秦篆遺文

秦泰山刻石

秦嶧山刻石

同前

前漢二器銘

前漢谷口銅甬銘

前漢雁足鐙銘

後漢西嶽華山廟碑

後漢樊毅華嶽碑

同前

後漢修西嶽廟復民賦碑

後漢北嶽碑

後漢無極山神廟碑

後漢桐柏廟碑

後漢穀阬君神祠碑

卷之二

後漢堯母碑

後漢堯祠碑

後漢堯祠祈雨碑

後漢老子銘

後漢魯相置孔子廟卒史碑

後漢修孔子廟器碑

後漢魯相晨孔子廟碑

後漢碑陰題名

同前

同前

後漢張公廟碑

後漢公昉碑

後漢析里橋郝閣頌

後漢人闕銘

後漢文翁石柱記

後漢文翁學生題名

後漢泰山都尉孔君碑

後漢孔宙碑陰題名

後漢孔君碑

後漢孔德讓碑

後漢劉寬碑

後漢太尉劉寬碑

後漢太尉劉寬碑陰題名

後漢楊震碑

後漢楊震碑陰題名

後漢沛相楊君碑

後漢繁陽令楊君碑

後漢高陽令楊君碑

後漢楊君碑陰題名

同前

後漢碑陰題名

後漢楊公碑陰題名

後漢殘碑陰

後漢朔方太守碑陰

後漢劉曜碑

後漢北海相景君銘

後漢謁者景君碑

後漢景君石郭銘

後漢袁良碑

後漢張平子墓銘

卷之三

後漢費鳳碑

後漢武班碑

後漢中常侍費亭侯曹騰碑

後漢司隸楊君碑

後漢樊常侍碑

後漢郎中鄭固碑

後漢田君碑

後漢孫叔敖碑

後漢王元賞碑

後漢祝睦碑

後漢祝睦後碑

後漢衡方碑

後漢冀州從事張表碑

後漢竹苞侯相張壽碑

後漢金鄉守長侯君碑

後漢慎令劉君墓碑

後漢北軍中候郭君碑

後漢司隸從事郭君碑

後漢魯峻碑

後漢玄儒婁先生碑

後漢郭先生碑

又

後漢桂陽太守周府君紀功銘

後漢桂陽周府君碑

後漢桂陽周府君碑後本

後漢費府君碑

後漢郎中王君碑

後漢太尉陳球碑

後漢敬仲碑

後漢無名碑

後漢豪長蔡君頌碑

後漢唐君碑

後漢朱龜碑

後漢小黃門譙君碑

後漢熊君碑

後漢俞鄉侯季子碑

後漢武榮碑

後漢秦君碑首

又

後漢元節碑

後漢殘碑

後漢天祿辟邪字

卷之四

魏受禪碑

魏公卿上尊號表

魏鍾錄表

又

魏劉熹學生冢碑

魏賈逵碑

魏鄧乂碑

吳九真太守谷府君碑

吳國山碑

晉南鄉太守頌

晉南鄉大乘碑

南鄉太守碑陰

晉陸階碑

晉蘭亭修禊序

范文度模本蘭亭序

又

又

晉樂毅論

晉王獻之法帖

又

晉賢法帖

晉七賢帖

宋文帝神道碑

宋宗懋母夫人墓誌

齊鎮國大銘像碑

南齊海陵王墓銘

梁智藏法師碑

陳張慧湛墓誌銘

陳浮屠智永書千字文

又

大代修華嶽廟碑

又

後魏孝文北巡碑

後魏定鼎銘

後魏石門銘

後魏神龜造碑像記

東魏任城王造浮圖像

東魏造石像記

魏九級塔像銘

北齊常山義七級碑

又

永樂十六角題名

魯孔子廟碑

北齊石浮圖記

後周大像碑

卷之五

隋老子廟碑

隋尙朱敞碑

隋龍藏寺碑

又

隋太平寺碑

隋李康清德頌

隋梁洋德政碑

隋韓擒虎碑

隋陳茂碑

隋蒙州普光寺碑

隋丁道護啓法寺碑

隋鉗耳君清德頌

隋廬山西林道場碑

又

唐孔子廟堂碑

千文後虞世南書

唐德州長壽寺舍利碑

唐幽州昭仁寺碑

唐呂州普濟寺碑

唐衛國公李靖碑

唐顏師古等慈寺碑

隋郎茂碑

又

唐郎穎碑

唐郎穎碑陰題名

唐九成宮醴泉銘

唐歐陽率更臨帖

唐岑文本三龕記

唐孟法師碑

唐皇甫忠碑

唐辨法師碑

唐孔穎達碑

唐薛稷書

唐益州學館廟堂記

唐徐王元禮碑

唐龍興宮碧落碑

唐智乘寺碑

唐吳廣碑

唐水門縣西浮圖碑

唐陶雲德政碑

隋汎愛寺碑

卷之六

唐八都壇實錄

唐魏載墓誌銘

唐乙速孤神慶碑

唐薛仁貴碑

唐尹氏闕文

唐尹孝子旌表文

唐孝子張常洧旌表碣

唐渭南令李君碑

同前

唐流杯亭侍宴詩

同前

唐司刑寺大脚跡赦

唐韓覃幽林思

唐武盡禮寧照寺鍾銘

唐韋維善政論

唐令長新戒

唐華陽頌

唐有道先生葉公碑

唐李邕高嶽寺碑

唐李邕端州石室記

唐獨孤府君碑

同前

唐裴大智碑

唐張嘉正碑

唐郭知運碑銘

唐御史臺精舍記

唐西嶽大洞張尊師碑

唐景陽井銘

唐華嶽題名

唐石臺道德經

唐羣臣請立道德經臺奏答

唐陝州盧奐廳事讚

唐鵲領頌

唐玄宗謁玄元廟詩

唐裴光庭碑

唐萬回神迹記碑

唐安公美政頌

唐石壁寺鐵彌勒像贊

唐郎官石記

唐開元聖像碑

唐大照禪師碑

唐舞陽侯祠堂碑

唐崔潭龜詩

唐興唐寺石經藏讚

唐蔡有鄰盧舍那珉像碑

唐植柏頌

唐美原夫子廟碑

唐鄭預注多心經

卷之七

唐開元金籙齋頌

唐龍興七祖堂頌

唐明禪師碑

唐徐浩玄隱塔銘

唐顏真卿書東方朔畫贊

唐畫贊碑陰

唐顏魯公題名

同前

唐顏真卿麻姑壇記

唐顏真卿小字麻姑壇記

唐中興頌

又

唐干祿字樣

唐干祿字樣模本

又

唐歐陽瑄碑

唐杜濟神道碑

唐杜濟墓誌銘

唐顏真卿射堂記

唐張敬因碑

又

唐顏勤禮神道碑

唐顏氏家廟碑

唐顏魯公書殘碑

又

唐湖州石記

唐顏魯公帖

唐顏魯公二十二字帖

唐顏魯公法帖

唐元次山銘

唐呂誼表

又

唐元結窪樽銘

唐元結陽華巖銘

唐元結晤臺銘

唐張中丞傳

唐李陽冰城隍神記

唐李陽冰忘歸臺銘

唐縉雲孔子廟記

唐裴虬怡亭銘

唐李陽冰庶子泉銘

唐李陽冰阮客舊居詩

唐裴公紀德碣銘

又

唐玄靜先生碑

唐龍興寺四絕碑首

唐滑州新驛記

唐王師乾神道碑

唐徐方回西墉記

唐禹廟碑

唐崇徽公主手痕詩

唐僧懷素法帖

唐重摹吳李子墓銘

又

唐竇叔蒙海濤誌

唐鹽宗神祠記

唐雁門王田氏神道碑

唐李愷碑

唐甘棠館題名

唐汾陽王廟碑

唐郭忠武公將佐略

唐濟瀆廟祭器銘

唐神女廟詩

唐馬寔墓誌銘

又

唐石洪鍾山林下集序

唐房太尉遺愛碑陰記

唐賀蘭夫人墓誌

唐陸文學傳

唐辨正禪師塔院記

唐韓愈盤谷詩序

唐韓退之題名

唐田弘正家廟碑

唐韓愈南海神廟碑

唐韓愈羅池廟碑

唐韓愈黃陵廟碑

唐胡良公碑

唐韓文公與顛師書

唐高閑草書

唐武侯碑陰記

唐盧頊禱聰明山記

唐侯喜復黃陂記

又

唐柳宗元般舟和尚碑

唐南嶽彌陀和尚碑

唐元稹修桐柏宮碑

唐虞城李令去思碑

唐陽公舊隱碣

唐于窆神道碑

唐昭懿公主碑

唐李光進碑

卷之九

唐樊宗師絳守居園池記

唐張九齡碑

唐田布碑

唐沈傳師游道林嶽麓寺詩

唐崔能神道碑

唐李德裕茅山三像記

唐李德裕平泉草木記

唐李文饒平泉山居詩

唐李德裕大孤山賦

唐大孤山賦

唐辨石鍾山記

唐法華寺詩

唐薛苹唱和詩

唐僧靈澈詩

唐李藏用碑

唐玄度十體書

唐鄭澣陰符經序

又

唐山南西道驛路記

唐何進滔德政碑

唐李聽神道碑

唐李石神道碑

唐高重碑

唐康約言碑

唐復東林寺碑

唐王質神道碑

唐會昌投龍文

唐俞珣書陳果仁告身并捨宅造寺疏

唐圭峰禪師碑

唐濠州勸民栽桑敕碑

唐閩遷新社記

又

唐令狐楚登白樓賦

唐百巖大師懷暉碑

唐孔府君神道碑

唐白敏中碑

唐于僧翰尊勝經

唐張將軍新廟記

唐王重榮德政碑

唐礮溪廟記

唐梁公儒碑

唐花林宴別記

唐陽武復縣記

唐崔敬嗣碑

唐潤州陀羅尼經幢

唐夔州都督府記

唐鄭權碑

唐王藻詩

唐人書楊公史傳記

唐放生池碑

卷之十

瘞鶴銘

又

黃庭經

又

又

又

遺教經

小字道德經

唐人臨帖

小字法帖

又

十人家法帖

雜法帖六

懷州孔子廟記

景福遺文

浮槎寺八紀詩

福州永泰縣無名篆

又

謝僊火

張龍公碑

又

周伯著碑

衛秀書梁思楚碑

裴夫人誌

五代時人署字

楊凝式題名

徐鉉雙溪院記

王文秉小篆千字文

王文秉紫陽石磬銘

郭忠恕小字說文字源

郭忠恕書陰符經

太清石闕題名

太清東闕題名

賽陽山文

卷之十一

書李翱集後

書梅聖俞藁後

讀李翱集

書春秋繁露後

書韋應物西澗詩後

論尹師魯墓誌

書沖厚居士墓銘後

讀裴寂傳

書梅聖俞河豚魚詩後

書三絕句詩後

跋晏元獻公書

跋李西臺書

同前

跋李翰林昌武書

記舊本韓文後

題薛公期畫

跋杜邴公書

跋永城縣學記

書荔枝譜後

跋學士院題名

跋茶錄

跋觀文王尚書舉正書

跋學士院御書

跋穉簡肅公奎書

跋醉翁吟

題青州山齋

跋三絕帖

六一題跋目錄終

自序

物常聚於所好而常得於有力之彊有力而不好
好之而無力雖近且易有不能致之象犀虎豹蠻
夷山海殺人之獸然其齒角皮革可聚而有也玉
出崑崙流沙萬里之外經十餘譯乃至乎中國珠
出南海常生深淵採者腰絙而入水形色非人往
往不出則下飽蛟魚金礦於山鑿深而穴遠篝火
餽糧而後進其崖崩窟塞則遂葬於其中者率常

數十百人其遠且難而又多死禍常如此然而金玉珠璣世常兼聚而有也凡物好之而有力則無不至也湯盤孔鼎岐陽之鼓岱山鄒嶧會稽之刻石與夫漢魏以來聖君賢士桓碑彝器銘詩序記下至古文籀篆分隸諸家之字書皆三代以來至寶怪奇偉麗工妙可喜之物其去人不遠其取之無禍然而風霜兵火湮淪磨滅散棄於山崖墟莽之間未嘗收拾者由世之好者少也幸而有好之

者又其力或不足故僅得其一二而不能使其聚也夫力莫如好好莫如一子性顓而嗜古凡世人之所貪者皆無欲於其間故得一其所好於斯好之已篤則力雖未足猶能致之故上自周穆王以來下更秦漢隋唐五代外至四海九州名山大澤窮崖絕谷荒林破塚神僊鬼物詭怪所傳莫不皆有以爲集古錄以爲轉一作傳寫失真故因其石本軸而藏之有卷帙次第而無時世之先後蓋其取

多而未已故隨其所得而錄之又以爲聚多而終必散乃撮其大要別爲錄目因并載夫可與史傳正其闕繆者以傳後學庶益於多聞或譏予曰物多則其勢難聚聚久而無不散何必區區於是哉予對曰足吾所好玩而老焉可也象犀金玉之聚其能果不散乎予固未能以此而易彼也廬陵歐陽修序

皆在洛陽與余遊者皆一時豪雋之士也而陳

郡謝希深善評文章河南尹師魯辨論精博余
每有所作二人者必伸紙疾讀便得余深意以
示他人亦或時有所稱皆非余所自得者也宛
陵梅聖俞善人君子也與余共處窮約每見余
小有可喜事懽然若在諸已自三君之亡余亦
老且病矣此敘之作旣無謝尹之知音而集錄
成書恨聖俞之不見也悲夫嘉祐八年歲在癸
卯七月二十四日書

錄目記 公子棐

集古錄既成之八年家君命棐曰吾集錄前世
 埋沒缺落之文獨取世人無用之物而藏之者
 豈徒出於嗜好之僻而以爲耳目之玩哉其爲
 所得亦已多矣故嘗序其說而刻之又跋於諸
 卷之尾者二百九十六篇序所謂可與史傳正
 其闕繆者已粗備矣若撮其大要別爲目錄則
 吾未暇然不可以闕而不備也棐退而悉發千

卷之藏而考之曰嗚呼可謂詳矣蓋自文武以
來迄於五代盛衰得失賢臣義士姦雄賊亂之
事可以動人耳目者至於釋氏道家之言莫不
皆有然分散零落數千百年而後聚於此則亦
可謂難矣其聚之旣難則其久也又將遂散而
無傳宜公之惜乎此也於是各取其書撰之人
事迹之始終所立之時世而著之爲一十卷以
附於跋尾之後夫事必簡而不煩然後能傳於

久遠今此千卷之書者刻之金石託之山崖未嘗不爲無窮之計也然必待集錄而後著者豈非以其繁一作多而難於盡傳哉故著其大略而不道其詳者公之志也熙寧二年二月記

右集古錄序成於嘉祐末年其云有卷帙次第無時世先後蓋取多而未已故隨其所得而錄之此公述千卷不以世代爲序之意也又云撮其大要別爲目錄因載夫可與史傳正其闕繆

者以傳後學此公述錄目跋尾之意也至熙寧
二年公之子叔弼記其後云公命棐曰吾跋諸
卷之尾者二百九十六篇若撮其大要別爲錄
目則吾未暇棐乃盡發千卷著其大略自今觀
之公序明言別爲錄目而棐乃記公未暇之語
世傳集古跋十卷四百餘篇而棐乃謂二百九
十六篇雖是時公尚無恙後三年方薨然續跋
纔十餘耳不應多踰百篇得非寫本誤以三百

爲二百或斐記在熙寧之前耶斐又云爲十卷
附跋尾之後今錄目自爲一書乃二十卷不過
列碑石所在及其名氏歲月初無難者何未暇
之有是皆可疑姑以斐所記附公本序之後而
自周秦至於五季皆隨年代爲之序庶幾時世
先後秩然不紊間有書撰出於一手其歲月相
邇則類而次之又於每卷之末備存當時卷帙
之次第旣以便今亦不失其初云□□□□

六一題跋卷之一

宋 廬陵歐陽修 撰

明 海虞毛 晉 訂

古敦銘

毛伯敦

龔伯彛

伯庶父敦

右毛伯古敦銘嘉祐中原父以翰林侍讀學士出
為永興軍路安撫使其治在長安原父博學好古
多藏古奇器物能讀古文一作銘識考知其人
事蹟而長安秦漢故都時時發掘所得原父悉購而

藏之以予方集錄古文故每有所得必摹其銘文以見遺此敦原父得其蓋於扶風而有此銘原父爲余考按其事云史記武王克商尚父牽牲毛叔鄭奉明水則此銘謂鄭者毛叔鄭也銘稱伯者爵也史稱叔者字也敦乃武王時器也蓋余集錄最後得此銘當作錄目序時但有伯冏銘吉日癸巳字最遠故敘言自周穆王以來敘已刻石始得斯一作銘乃武王時器也其後二銘一得盤屋曰龔

伯尊彝其一亦得扶風曰伯庶父作舟姜尊敦皆
不知爲何人也三器銘文皆完可識具列如左
右真蹟

毛伯敦銘

釋文

惟二年正月初吉王在周昭宮丁亥王格于宜
射毛伯入門位中庭右祝鄭王呼內史冊命鄭
王曰鄭管先王既命女作邑一字未詳五邑祝今余
佳亂商乃命賜女赤芾同冕齊黃絲旂用事鄭

拜稽首敢對揚天子休命鄭用作朕皇考龔伯尊敦鄭其鬻壽萬年無疆子子孫孫永寶用享

辭尚功釋云惟二年正月初吉王在周邵宮丁亥王格于宣榭毛伯內門立中廷佑祝邢王呼內史册命邢王曰邢管先王既命汝作邑繼五邑祝今余惟噎京乃命錫汝赤芾彤冕齊黃鑿旂用事邢拜稽首敢對揚天子休命邢用作朕皇考龔伯尊敦邢其眉壽萬年無疆子子孫孫永寶用享

龔伯彝銘

釋文

爨作皇祖懿公文公武伯皇考龔伯尊彝爨其

熙萬年無疆霈終霈始其子子孫孫永寶用享

于宗室

辨尚功釋云屨作皇祖益公文公武伯皇考龔伯龔彝屨其熙萬年無疆令終

令命其子子孫孫永寶用享于宗室

伯庶父敦銘

釋文

惟二月戊寅伯庶父作王姑舟姜尊敦其永寶

用辨尚功釋舟為尚餘同上

韓城鼎銘

右原父既得鼎韓城遺予以其銘而太常博士揚

南仲能讀古文篆籀爲余以今文寫之而闕其疑者原父在長安所得古奇器物數十種亦自爲先秦古器記原父博學無所不通爲余釋其銘以今文而與南仲時有不同故并著二家所解以俟博識君子具之如左

右真蹟

惟王九月乙亥晉姜曰余惟司朕先姑君晉邦
余不○安寧罔讎明德宣○我猷用○所辭辟
○○○○○剿虔不○○○○○呂寵我萬民嘉遺

我錫鹵賚于兩參濇文侯頽令畢○○○征綏
○○堅久吉金用作寶尊鼎用康馥妥懷遠邦
君子晉姜用斲○○麋壽作惠○亟萬年無疆
用德峻保其孫子三壽是利

右原父釋文

商雒鼎銘 真蹟

右商雒鼎銘者原父在長安時得之上雒其銘云
惟十有四月既死霸王在下都雒公誠作樽鼎用

追享丁于皇且考用气麋壽萬年無疆子子孫孫
永寶用雖公不知為何人原甫謂古丁寧通用蓋
古字簡略以意求之則得爾而蔡君謨謂十有四
月者何原甫亦不能言也治平元年中伏日書

古器銘

鍾銘二
甌銘二

缶器銘一
寶敦銘一

字疑非缶

右古器銘六余嘗見其二曰甌也寶酥鍾也太宗
皇帝時長安民有耕地得此甌初無識者其狀下
為鼎三足上為方甌中設銅簞可以開闔製作甚

精有銘在其側學士句中正工於篆籀能識其文
曰甌也遂藏於祕閣予爲按勘時常閱於祕閣下
景祐中修大樂治工給銅更鑄編鍾得古鍾有銘
於腹因存而不毀卽寶酥鍾也余知太常禮院時
嘗於太常寺按樂命工叩之與王朴夷則清聲合
初王朴作編鍾皆不圓至李照等奉詔修樂皆以
朴鍾爲非及得寶酥其狀正與朴鍾同乃知朴爲
有法也嘉祐八年六月十八日書

右真蹟

同前

綏和鍾

寶盃

寶敦

右古器銘四尚書屯田員外郎楊南仲爲余讀之
其一曰綏和林鍾其文磨滅不完而字有南仲不
能識者其二曰寶盃其文完可讀曰伯玉般子作
寶盃其萬斯年子子孫孫其永寶用其三其四皆
曰寶敦其銘文亦同曰惟王四年八月丁亥散季
肇作朕王母弟姜寶敦散季其萬年子子孫孫永
寶蓋一敦而二銘余家集錄所藏古器銘多如此

也治平元年七月十三日以服藥假家居書

右真蹟

自余集錄古文所得三代器銘必問於楊南仲章

友直暨集錄成書而南仲友直相繼以死古文奇

字世罕識者而三代器銘亦不復得矣治平三年

七月二十一有日一有孟饗攝事太廟齋宮書右真蹟

蹟

終南古敦銘

右終南古敦銘大理評事蘇軾爲鳳翔府判官得

古器於終南山下其形制與今三禮圖所畫及人家所藏古敦皆不同初莫知爲敦也蓋其銘有寶尊敦之文遂以爲敦爾

右集本

叔高父鬻簋銘

右鬻簋銘曰叔高父作鬻簋其萬年子子孫孫永寶用原父在長安得此簋於扶風原父曰簋容四升其形外方內圓而小楨之似龜有首有尾有足有甲有腹今禮家作簋亦外方內圓而其形如桶

但於其蓋刻爲龜形一有爾字與原甫所得真古蓋不

同一有也字君謨以爲禮家傳其說不見其形制故名

存實亡原甫所見可以正其繆也故并錄之以見

君子之於學貴乎多見而博聞也治平元年六月

二十日書 右真蹟

周穆王刻石

右周穆王刻石曰吉日癸巳在今贊皇壇山上壇

山在縣南十三里穆天子傳云穆天子登贊皇一有

山以望臨城置壇此山遂以爲名癸巳誌其白也

圖經所載如此而又別有四望山者云是穆王所

登者

一作山

據穆天子傳但云登山不言刻石然字

畫亦奇怪土人謂壇山爲馬蹬山以其召字形類也慶曆中宋尚書祁在鎮陽遣人於壇山摹此字而趙州守將武臣也遽命工鑿山取其字龕于州解之壁聞者爲之嗟惜也治平甲辰秋分日書

右真

蹟

敦匱銘

周姜寶敦

張伯煇匱

右伯匱敦銘曰伯匱父作周姜寶敦用夙夕享用
斲萬壽尚書匱命序曰穆王命伯匱爲周太僕正
作此敦周穆王時器也按史記年表自厲王以上
有世次而無年數共和以後接乎春秋年數乃詳
蓋自穆王傳共孝懿夷厲五王而至於共和自共
和至今蓋千有九百餘年斯敦之作在共和前五
世而遠也古之人之欲存乎久遠者必託于金石

而後傳其湮沉埋沒顯晦出入不可知其可知者
久而不朽也然岐陽十鼓今皆在而文字剝缺者
十三四惟古器銘在者皆完則石之堅又不足恃
是以古之君子器必用銅取其不爲燥溼寒暑所
變爲可貴者以此也古之賢臣名見詩書者嘗爲
後世想望矧得其器讀其文器古而文奇自可寶
而藏之耶其後張伯匱銘曰張伯作鬻匱其子子
孫孫永寶用張伯不知何人也二銘皆得之原甫

也 右集本

敦 醫 銘

伯岡敦

張仲医

嘉祐六年原父以翰林侍讀學士出爲永興軍路
安撫使其治在長安原父博學好古多藏古器奇
物而咸鎬周秦故都其荒基破塚耕夫牧兒往往
有得必購而藏之以余方集錄古文乃摹其銘刻
以爲遺故余家集古錄自周武王以來皆有者多
得於原父也歸自長安所載盈車而以其二器遺

余其一曰伯冏之敦其一曰張仲之匡其形制與
今不同而極精巧敦匡皆有銘而云匡獲其二皆
有蓋而上下皆銘銘文皆同甚矣古之人慮遠也
知夫物必有弊而百世之後埋沒零落幸其一在
尚冀或傳爾不然何丁寧重複若此之煩也其於
一用器爲慮猶如此則其操修施設所以垂後世
者必不苟二子名見詩書伯冏周穆王時人張仲
宣王時人太史公表次三代以來自共和以後年

世乃詳蓋自共和元年逮今千有九百餘年而穆
王又共和前五世可謂遠矣而斯器也始獲於吾
二人其中間晦顯出入不可知以其無文字以志
之也蓋其出或非其時而遇或非其人者物有幸
不幸也今出而遭吾二人者可謂幸矣不可以不
傳故爲之書且以爲贈我之報歐陽修記

右集本

張仲器銘

集本

右張仲器銘四其文皆同而轉注偏傍左右或異

蓋古人用字如此爾嘉祐中原父在長安獲二古
器於藍田形制皆同有蓋而上下有銘甚矣古人
之爲慮遠也知夫物必有弊而百世之後埋沒零
落幸其一在尚冀或傳爾不然何丁寧重複一作復
若此之煩也詩六月之卒章曰侯誰在矣張仲孝
友蓋周宣王時人也距今實千九百餘年而二器
始復出原甫藏其器予錄其文蓋仲與吾二人者
相期於二千年之間可謂遠矣方仲之作斯器也

豈必期吾二人者哉蓋久而必有相得者物之常
理爾是以君子之於道不汲汲而志常在於遠大
也原父在長安得古器數十作先秦古器記而張
仲之器其銘文五十有一其可識者四十一具之
如左其餘以俟博學君子

石鼓文

右石鼓文岐陽石鼓初不見稱於前世至唐人始
盛稱之而韋應物以爲周文王之鼓一有至字宣王刻

詩

一有爾字

韓退之直以爲宣王之鼓在今鳳翔孔子

廟中鼓有十先時散棄於野鄭餘慶置於廟而亡

其一皇祐四年向傳師求於民間得之

一有十鼓二字 廼

足其文可見者四百六十五

一有磨滅二字

不可識者過

半余所集錄文之古者莫先於此然其可疑者三

四今世所有漢桓靈時碑往往尚在其距今未及

千歲大書深刻而磨滅者十猶八九此鼓按太史

公年表自宣王共和元年至今嘉祐八年實千有

九百一十四年鼓文細而刻淺理豈得存此其可疑者一也其字古而有法其言與雅頌同文而詩書所傳之外三代文章真蹟在者惟此而已然自漢以來博古好奇之士皆略而不道此其可疑者二也隋時藏書最多其志所錄秦始皇刻石婆羅門外國書皆有而獨無石鼓遺近錄遠不宜如此此其可疑者三也前世傳記所載古遠奇怪之事類多虛誕而難信況傳記不載不知韋韓二君何

據而知爲文宣之鼓也隋唐古今書籍粗備豈當時猶有所見而今不見之邪然退之好古不妄者余姑取以爲信爾至於字畫亦非史籀不能作也廬陵歐陽某記嘉祐八年六月十日書

右真蹟

秦度量銘

右秦度量銘二按顏氏家訓隋開皇二年之推與李德林見長安官庫中所藏秦鐵稱權傍有鐫銘二其文正與此二銘同之推因言司馬遷秦始皇

帝本紀書丞相隗林當依此銘作隗狀遂錄二銘
載之家訓余之得此二銘也迺在祕閣校理文同
家同蜀人自言嘗遊長安買得一有此字二物其上刻
二銘出以示余其一乃銅鏃不知爲何器其上有
銘循環刻之乃前一銘也其一乃銅方版可三四
寸許所刻乃後一銘也考其文與家訓所載正同
然之推所見是鐵稱權而同所得乃二銅器余意
秦時茲二銘刻於器物者非一也及後又於集賢

按理陸經家得一銅版所刻與前一銘亦同益知其然也故并錄之云嘉祐八年七月十日書

右真蹟

秦昭和鍾銘

右秦昭和鍾銘曰秦公曰丕顯朕皇祖受天命奄有下國十有二公按史記秦本紀自非子邑秦而秦仲始爲大夫卒莊公立卒襄公文公寧公出公武公德公宣公成公穆公康公共公桓公景公相次立太史公於本紀云襄公始立爲諸侯於諸侯

年表則以秦仲爲始今據年表始秦仲則至康公
爲十二公此鍾爲共公時作也據本紀自襄公始
則至桓公爲十二公而銘鍾者當爲景公也故竝
列之以俟博識君子治平元年二月社前一日書
右真蹟

秦祀巫咸神文

一作秦誓文

右秦祀巫咸神文今流俗謂之詛楚文其言首述
秦穆公與楚成王事遂及楚王熊相之罪按司馬

遷史記世家自成王以後王名有熊良夫熊適熊
槐熊元而無熊相據文言穆公與成王盟好而後
云倍十八世之詛盟今以世家考之自成王十八
世爲頃襄王而頃襄王名橫不名熊相又以秦本
紀與世家參較自楚平王娶婦於秦昭王時吳伐
楚而秦救之其後歷楚惠簡聲悼肅五王皆寂不
與秦相接而宣王熊良夫時秦始侵楚至懷王熊
槐頃襄王熊橫當秦惠文王及昭襄王時秦楚屢

相攻伐則此文所載非懷王則項襄王也而名皆
不同又以十八世數之則當是項襄然則相之名
理不宜繆但史記或失之爾疑相傳寫爲橫也

右真

蹟

之采山秦篆遺文

集本

右秦篆遺文纔二十一字曰於久遠也如後嗣馬
成功盛德臣去疾御史大夫臣德其文與嶧山碑
泰山刻石二世詔語同而字畫皆異惟泰山爲真

李斯篆爾此遺者或云麻温故學士於登州海上
得片木有此文豈杜甫所謂棗木傳刻肥失真者
邪

秦泰山刻石

一作書李斯篆後集本

右秦二世詔李斯篆天下之事固有出於不幸者
矣苟有可以用於世者不必皆賢聖之作也蚩尤
作五兵紂作漆器不以二人之惡而廢萬世之利
也篆字二字一作小篆之法出於秦李斯斯之相秦焚棄

典籍遂欲滅先王之法而獨以已之所作刻石而

示萬世何哉十四字一作至已之所作則為萬世不可朽之計何其愚哉按史

記秦始皇帝行幸天下凡六刻石及二世立又刻

詔書于一作於其旁今皆亡矣獨秦山頂上二世有

此字詔僅在所一無存數十字爾今俗傳嶧山碑者

史記不載又其字體差大六字一作其字特大不類泰山存

者其本出於徐鉉一無此六字又有別本云一無此出於

夏竦家者以今市人所鬻校之無異一無此十一字自唐

封演已言嶧山碑非真而杜甫直謂棗木傳刻爾

皆不足貴也

一無此
五字

余友江鄰幾

一作
休復

謫官於奉

符嘗自至泰山頂上視秦所刻石處云石頑不可

鑄鑿不知當時何以刻也然而

二字一
作其

四面皆

有一

石無草木而野火不及故能若此之久

一有
也字

然風

雨所剝其存者纔此數十字

一無此
三字

而已本鄰幾

遺余也比今俗傳嶧山碑本特為真者爾

一無此
十九字

只作休復

字鄰幾

秦嶧山刻石 真蹟

右秦嶧山碑者始皇帝東巡羣臣頌德之辭至二世時丞相李斯始以刻石今嶧山實無此碑而人家多有傳者各有所自來晉徐鉉在江南以小篆馳名鄭文寶其門人也嘗受學於鉉亦見稱於一時此本文寶云是鉉所摹文寶又言嘗親至嶧山訪秦碑莫獲遂以鉉所摹刻石於長安世多傳之余家集錄別藏泰山李斯所書數十字尚存以較

摹本則見真僞之相遠也治平元年六月立秋日

同前 一作秦二世詔

右鄒嶧山秦二世刻石以泰山所刻較之字之存者頗多而磨滅尤甚其趙嬰楊樛姓名以史記考之乃微可辨其文曰大夫趙嬰五大夫楊樛皇帝曰金石刻盡始皇帝所爲也今襲號而金石刻凡二十九字多於泰山存者而泰山之石又滅盛德二字其餘則同而嶧山字差小又不類泰山存者

刻畫完好而附錄于一作於此者古物難得兼資博覽爾蓋集錄成書後八年得此于一作於青州而附

之熙寧元年秋九月六日書右真蹟

前漢二器銘林華宮行鐙一歲月見本文蓮勺宮博山爐

劉原父帖

近又獲一銅器刻其側云林華觀行鐙重一斤

十四兩五鳳二年造第一今附墨本上呈

右林華宮行鐙銘一蓮勺宮銅博山爐下槃銘一

六一題跋 卷一

皆漢五鳳中造林華宮漢書不載宣帝本紀云困於蓮勺鹵中注云縣也亦不云有宮蓋秦漢離宮別館不可勝數非因事見之則史家不能備載也余所集錄古文自周穆王以來莫不有之而獨無前漢時字求之久而不獲每以爲恨嘉祐中友人劉原父出爲永興守長安秦漢故都多古物奇器埋沒於荒基敗塚往往爲耕夫牧豎得之遂復傳於人間而原父又雅喜藏古器由此所獲頗多而

以余方集古文故每以其銘刻爲遺旣獲此二銘
其後又得谷口銅甬銘乃甘露中造由是始有前
漢時字以足余之所闕而大償其素願焉余所集
錄旣博而爲日滋久求之亦勞得於人者頗多而
最後成余志者原父也故特誌之嘉祐八年歲在
癸卯七月二十日書

右真蹟

前漢谷口銅甬銘

歲月見本文

右漢谷口銅甬原父在長安時得之其前銘云谷

口銅甬容十其下減兩字始元四年左馮翊造其
 後銘云谷口銅甬容十斗重四十斤甘露元年十
 月計掾章平左馮翊府下減一字原父以今權量
 技之容三斗重十五斤始元甘露皆宣帝年號有
 也余所集錄千卷前漢時文字惟此與林華行鐙
 蓮勺博山爐盤銘爾治平元年六月九日書右真蹟

前漢雁足鐙銘

此跋本與漢二器銘
銅甬銘共為一卷

裴如晦帖

煜頃嘗謂周秦東漢往往有銘傳於世間獨西漢無有王原叔言華州片瓦有元光字急使人購得之乃好事者所爲非漢字也侍坐語及公亦謂家集所闕西漢字耳煜守丹陽日蘇氏者出古物有銅雁足鐙制作精巧因辨其刻則黃龍元年所造其言榮宮二史間未始槩見遂摹之欲寄左右以爲集古錄之一事會悲苦不果昨偶開篋見之謹以上獻亦聞原甫於秦中得

西漢數器不知文字與此類不煜再拜

治平元年十二月

月十四日

後三年予出守亳社而裴如晦以疾卒于京師明年原甫卒于南都二人皆年壯氣盛相次以沒而予獨歸然而存也熙寧壬子四月

右真蹟

後漢西嶽華山廟碑

歲月見本文

右漢西嶽華山廟碑文字尚完可讀其述自漢以來云高祖初興改秦淫祀太宗承循各詔有司其

山川在諸侯者以時祠之孝武皇帝修封禪之禮
巡省五嶽立宮其下宮曰集靈宮殿曰存僊殿門
曰望僊門中宗之世使者持節歲一禱而三祠後
不承前至於亡新寤用丘虛建武之元事舉其中
禮從其省但使二千石歲時往祠自是以來百有
餘年所立碑石文字磨滅延熙四年弘農太守袁
逢修廢起頓易碑飾闕會遷京兆尹孫府君到欽
若嘉業遵而成之孫府君諱璆其大略如此所謂

集靈宮者他書皆不見惟見此碑一有爾字則余之集

錄不為無益矣一無此十字治平元年閏五月十六日

書 右真蹟

後漢樊毅華嶽碑 歲月見本文

右漢樊毅華嶽碑云泰華之山削成四方其高五千仞廣十里周禮職方氏華謂之西嶽祭視三公者以能興雲雨產萬物通精氣有益於人則祀之故帝舜受堯親自巡省暨夏殷周未之有改秦違

其典壁遺鄣池二世以亡漢祖應運禮遵陶唐祭
則獲福亦世克昌亡新滔逆鬼神不享建武之初
葺掃頑凶光和二年有漢元舅五侯之胄謝陽之
孫曰樊府君諱毅字仲德命守斯邦孟冬十月齋
祠西嶽以傳窄狹不足處尊卑廟舍舊久墻屋傾
亞特部行事荀班縣令先讜以漸補治此其事也
又云功曹郭敏等遂刊玄石銘勒鴻勳其字畫頗
完其文彬彬可喜惟以周禮職方氏爲識方氏其

字畫分明非譌缺疑當時周禮之學自如此蓋識
誌其義皆通也治平元年五月十日書

右真蹟

同前

右漢樊毅修華嶽廟碑云惟光和元年歲在戊午
名曰咸池季冬己巳弘農太守河南樊君諱毅字
仲德下車之初恭肅神祀西嶽至尊詔書奉祠躬
親自往齋室逼窄法齋無所於是與令巴郡胸忍
先讜圖議繕故二年正月己卯興就刻茲碑號吏

卒挾路據此碑乃卽時所立而太守生稱諱者何
哉治平元年末伏日書

右真蹟

後漢修西嶽廟復民賦碑

歲月見本文

右漢修西嶽廟復民賦碑云光和二年十二月庚
午朔十三日壬午弘農太守臣毅頓首死罪上尚
書臣毅頓首頓首死罪死罪謹按文書臣以去元
年十一月到官其十二月奉祠西嶽華山省視廟
舍及齋衣祭器率皆久遠有垢臣以神嶽至尊空

加恭肅輒遣行事荀班與華陰令先讜以漸繕治
成就之又曰讜言縣當孔道加奉尊嶽一歲四祠
養牲百日用穀藁三千餘斛或有請雨齋禱役費
兼倍小民不堪有飢寒之窘違宗神之敬乞差諸
賦復華下十里以內民租田口臣輒聽盡力奉宣
詔書思惟惠利增異復上臣毅誠惶誠恐頓首頓
首死罪死罪上尚書漢家制度今不復見惟余家
集錄漢碑頗多故於磨滅之餘時見一二而此碑

粗完故錄其首尾以傳臣毅者樊毅也 右集本

後漢北嶽碑 歲月見本文 集本

右漢北嶽碑文字殘滅尤甚莫詳其所載何事第其隱隱可見者曰光和四年以此知爲漢碑爾其文斷續不可次序蓋多言珪幣牲酒黍稷豐穰等事似是禱賽之文其後有二人姓名偶可見云南陽冠軍馮巡字季祖甘陵夏方字伯陽其餘則莫可考

後漢無極山神廟碑

歲月見本文

右漢無極山神廟碑文字磨滅斷續然尋繹次序
其可見者尚可成文云太常臣耽丞敏頓首上尚
書謹按文書男子常山蓋高上黨范遷爲元氏三
公神山去年五月常山相巡詣山請兩山神卽使
高傳言白國縣卽與封龍靈山無極山共興雲雨
常山相巡元氏令王翊各以一白羊賽復使高與
遷俱詣太常爲無極山神索法食臣疑高遷言不

實輒移本國今常山相巡書言郡督郵言無極山
體可三里所立石爲體長二丈五尺所山周匝二
十餘里其三公封龍靈山皆得法食乞令無極山
比三山祠牲出王家以珪璧爲信愚臣如巡言請
少府給珪璧故事須報臣眡愚顛頓首頓首上尚
書制曰可尚書令忠奏雒陽宮太常承書從事光
和四年八月十七日下酉尚書令忠下太常眡丞
敏下常山相其奏章如此其後遂言造廟事而有

銘其文多不載按漢奏章首尾皆言臣某頓首頓

首死罪死罪上尚書而此碑所載太常

一有奏字章首

尾不稱死罪而丞敏又不稱臣莫曉其制碑後又

列常山官屬云常山相南陽馮巡字季祖元氏令

王翊字元輔云治平元年四月一日書

右真蹟

後漢桐柏廟碑

歲月見本文

右漢桐柏廟碑磨滅雖不甚而文字斷續粗可考

次蓋南陽太守修廟碑也其辭云延熹六年正月

乙酉南陽太守中山盧奴君奴下正闕一字當是
其姓又云尊神敬祀立廟桐柏春秋宗榮災異告
變水旱請求位比諸侯聖漢所尊一作宗太守奉祀
二十餘年不復身至遣丞行事簡略不敬明神弗
歆災害以生五嶽四瀆與天合德仲尼慎祭常若
神在君準則大聖親之桐柏來見廟祠崎嶇逼狹
開拓神門立闕四望增廣壇場又云執玉以沉爲
民祈福靈祈報祐天地清和其大意止於如此其

後有頌亦可讀第不見太守姓名爾然不著他事
惟修廟祀神爾桐柏淮瀆廟也治平元年六月十

三日書 右真蹟

後漢穀阬君神祠碑 光和四年

右漢穀阬君神祠碑在鄭縣慶曆中樞密直學士
施君爲陝西都轉運使爲余摹此本云碑文已磨
滅初不可辨以麩填其刻稍尋其點畫命工鐫治
之乃可讀漢碑今在者類多磨滅不完故斯碑歷

歷可見也惟裴曄姓名爲鄉人鑿去矣殺阬所以
畜洩水患據碑文云自亡新以來廢之則前漢時
已有之矣光和中曄爲鄭縣令始修復之事見水
經及華州圖經殺阬君祠今謂之五部神廟其像
有石隄西戍樹谷五樓先生東臺御史王翦將軍
皆莫曉其義施君名昌言今爲涇原路安撫使

木

右集

六一題跋卷之一

終

...

...

六一題跋卷之二

後漢堯母碑

歲月見本文

右漢堯母碑漢建寧五年造其文略曰堯母慶都

感赤龍而生堯遂以侯伯恢踐帝

下有闕

慶都僊沒

蓋葬於茲欲人莫知名曰靈臺上立黃屋堯所奉

祠三代改易荒廢不脩漢受濡期興滅繼絕如堯

為之遂遭亡新禮祠絕矣故廷尉

姓名磨滅不可讀矣

深惟

大漢堯之苗胄當脩堯祠追遠復舊前後奏上帝

納其謀歲以春秋奉大牢祠時濟陰太守魏郡審
晃成陽令博陵管遵各遣大掾輔助

闕一字

君經之

營之不日成之此其大槩也按皇覽云堯家在濟
陰城陽呂氏春秋云堯葬穀林皇甫謐云穀林卽
城陽然自史記地志及水經諸書無堯母葬處惟
見於此碑蓋亦葬城陽也而諸書俗本多爲城陽
獨此碑爲成陽當以碑爲正碑後列當時人名氏
又云審晃字元讓管遵字君臺又云漢受濡期莫

曉其義也

右集本

後漢堯祠碑

歲月見本文

右漢堯祠碑在濟陰碑云帝堯者蓋昔世之聖王也又曰聖漢龍興纂堯之緒祠以上犧至於王莽

絕漢之業而壇場夷替屏懾

真蹟作攝

無位大抵文

字磨滅字雖可見而不復成文其後有云李樹連理生於堯祠太守河南張寵到官始初出錢二千敬致禮祠其餘不能

一作可

讀也碑後有年月蓋熹

平四年建也治平元年五月晦日書

真蹟

後漢堯祠祈雨碑

歲月見本文

右漢堯祠祈雨碑首尾殘滅其僅可識者有云股肱賢良廣祈多福虔虔夙夜又云常以甲子曰詔太常陳上古之禮舞先王之樂又云延熹十年仲春二月陽氣侵陰又云享祀羣神仰瞻雲漢又曰嘉澍優霑利茂萬物又云孟府君知堯精靈與天通神脩治大殿以此知爲祈雨於堯祠也堯祠在

漢濟陰郡孟府君者當是濟陰郡太守也其餘隸
字完者頗多亦徃徃成句但斷續不可次序爾

右集

後漢老子銘

歲月見本文

右漢老子銘按桓帝本紀云延熹八年正月遣中
常侍左悺之苦縣祠老子至十一月又遣中常侍
管霸祠之而此碑云八月夢見老子而祠之世言
碑銘蔡邕作今檢邕集無此文皆不可知也

右真蹟

後漢魯相置孔子廟卒史碑 歲月見本文

右漢魯相置孔子廟卒史碑云司徒臣雄司空臣
戒稽首言魯前相瑛書言詔書崇聖道孔子作春
秋制孝經演易繫辭經緯天地故特立廟褒成侯
四時來祠事已卽去廟有禮器無常人掌領請置
百石卒史一人典主守廟謹問太常祠曹掾馮牟
史郭玄辭對故事辟雍祠先聖太宰太祝各一人
備爵太常丞監祠河南尹給牛羊豕大司農給米

臣愚以爲如瑛言可許臣雄臣戒愚戇誠惶誠恐
頓首頓首死罪死罪臣稽首以聞制曰可按漢書
元嘉元年吳雄爲司徒二年趙戒爲司徒卽此云
臣雄臣戒是也魯相瑛者據碑言姓乙字仲卿漢
碑在者多磨滅此幸完可讀錄之以見漢制三公
奏事如此與羣臣上尙書者小異也又見漢祠孔
子其禮如此治平元年六月二十日書

右真蹟

後漢脩孔子廟器碑

一作表

歲月見本文

右漢

一有朝字

韓明府脩孔子廟器碑云永壽二年青

龍

二字一作歲

在涪灘霜月之靈皇極之日永壽桓帝

年號也按爾雅云歲在申曰涪灘桓帝永興三年

正月戊申大赦改元永壽明年

一有歲次二字

丙申曰歲

在涪灘是矣云霜月之靈皇極之日莫曉其義疑

是九月五日前漢文章之盛庶幾三代之純深自

建武以後頓爾衰薄崔蔡之徒擅名當世然其筆

力辭氣非出自然與夫揚馬之言醇醜異味矣及

其末也不勝其弊霜月皇極是何等語韓明府者
名勅字叔節前世見於史傳未有名勅者豈自余
學之不博乎春秋左氏傳載古人命名之說不以
爲名者頗多故以勅爲名者少也治平元年二月

晦日書

右真蹟

後漢魯相晨孔子廟碑

歲月見本文

右漢魯相上尙書章其略云建寧二年三月癸卯
朔七日巳酉魯相臣晨長史臣謙頓首死罪上尙

書臣晨頓首頓首死罪死罪臣以元年到官行秋
饗飲酒泮宮復禮孔子宅而無公出酒脯之祠臣
輒依社稷出王家穀春秋行禮建寧靈帝年號也
於此見漢制天子之尊其辭稱頓首死罪而不敢
斥至尊因尙書以致達而已余家集錄漢碑頗多
亦有奏章患其磨滅獨斯碑首尾完備可見當時
之制也又云孔子乾坤所挺西狩獲麟爲漢制作
故孝經援神契曰玄丘制命帝卯行又尙書考靈

耀曰丘生倉際觸期稽度爲赤制識諱不經不待
論而可知甚矣漢儒之狹陋也孔子作春秋豈區
區爲漢而已哉治平元年三月廿五日書

右真蹟

後漢碑陰題名

歲月未詳

右漢碑陰題名不知爲何人碑余家集錄古文旣
多或失其所得之自然漢碑存於今者惟華嶽與
孔子廟最多其陰徃徃列脩廟人姓名并記其所
出錢數不過三百至五百今斯碑所題文字缺滅

而中間有錢各五百四字則似是脩廟人所記其人可見者有濟陰定陶蔡顥子盛山陽金鄉張諺季德河南宛陵趙堂世萇南陽南鄉鄧升升遠濟陰成武周鳳季節而其餘人姓名邑里多不完又時時有故吏字不知爲何人祠廟第以漢隸難得錄之爾治平元年閏五月八日書

右真蹟

同前

右漢碑陰題名不知爲何碑之陰蓋余家集錄旣

多而或失其所得之處又其文字磨滅莫可考究
惟有錢各五百四字似是漢時脩廟人爾漢碑今
在者惟華嶽與孔子廟中最多其碑陰題名者往
往各書所出錢數不過三百五百也而此碑所列
邑里姓名字完可見者尙十餘人然皆是濟陰山
陽彭城汝南陳留人則疑爲脩孔子廟人也今列
於後覽者可以察焉濟陰定陶蔡顓子盛濟陰張
翔季審陳留酸棗李直顯節山陽金鄉張諺季德

河南宛陵趙堂世萇南陽南鄉鄧升升遠濟陰成
武周鳳季節山陽昌邑田胤元尊濟陰成武史楞
世明彭城朱翔元舉

右真蹟

同前

右漢碑陰題名二皆不知爲何碑陰其人各記所
出錢數似是漢時脩廟人題名余家集錄華岳及
孔子廟碑多如此此亦疑是二廟中碑前碑殘滅
尤甚第時有門生濟南東郡等字而姓名無伏完

者後碑則有議曹功曹騎吏有蓮勺左鄉有秩池
陽左鄉有秩池陽集丞有秩皆不知是何名號又
有闕文二字陽候長枚栩候長則是縣吏之名其隸字
不甚精又無事實可考姑錄其名號以俟知者爾
右集本

後漢張公廟碑 歲月見本文 真蹟

右漢張公廟碑在黎陽而碑無題首又其文字殘
滅不可考究莫知爲何碑第時時得其字之可識

而僅成文者曰惟和平元年正月丙寅和平桓帝
年號以此知爲漢碑也又曰豐碑廟堂之前又曰
於穆張公則又知爲張公廟碑矣又云國無災穡
屢獲豐年作歌九章頌公德芳其辭有云公與守
相駕蜚魚往來倏忽遂熹娛祐此屯民寧厥居其
餘字畫尙完者甚多但不成文爾治平元年閏五
月九日書是日奏事垂拱退召赴延和閱謝契丹
禮物遂歸休

後漢公昉碑

一作仙人唐君碑
歲月未詳

右漢公昉碑者廼漢中太守南陽郭芝爲公昉脩
廟記也漢碑今在者類多磨滅而此記文字僅存
可讀所謂公昉者初不載其姓名但云君字公昉
爾又云耆者相傳以爲王莽居攝二年君爲郡吏
啖瓜旁有真人一有左右莫察君獨進美瓜又從
而敬禮之真人者遂與期谷口山上乃與君神藥
曰服藥以後當移意萬里知鳥獸言語是時府君

去家七百餘里休謁往來轉景卽至闔郡驚焉白

之府君徒爲御史

一作文

鼠齧被具君乃畫地爲獄

召鼠誅之視其腹中果有被具府君欲從學道頃
無所進府君怒敕尉部吏收公昉妻子公昉呼其
師告以厄其師以藥飲公昉妻子曰可去矣妻子
戀家不忍去於是乃以藥塗屋柱飲牛馬六畜湏
更有大風雲來迎公昉妻子屋宅六畜倏然與之
俱去其說如此可以爲怪妄矣嗚呼自聖人歿而

異端起戰國秦漢以來一作之餘奇辭怪說紛然爭出

不可勝數久而佛之徒來自西夷老之徒起於中國而二患交攻爲吾儒者徃徃牽而從之其卓然不惑者僅能自守而已欲排其說而黜之常患乎力不足也如公昉之事以語愚人豎子皆知其妄矣不待有力而後能破其惑也然彼漢人乃刻之金石以傳後世其意惟恐後世之不信然後世之人未必不從而惑也治平元年四月二十三日以

早開宮寺祈雨五日中一日休務假書 右真蹟

後漢析里橋郿閣頌 歲月見本文

右漢析里橋郿閣頌建寧五年立云惟斯析里處
漢之右溪源漂疾橫注於道涉秋霖漉稽滯商旅
休謁往還常失日晷行理咨嗟郡縣所苦斯溪旣
然郿閣尤甚臨深長淵三百餘丈接木相連號爲
萬柱遭遇隕納人物俱隳 一作隳 沈沒洪淵酷烈爲
禍於是太守阿陽李君諱會字伯都以建寧三年

二月辛巳到官思惟惠利有以綏濟聞此爲難其
日久矣乃俾府椽仇審改解危殆卽便求隱析里
大橋於爾乃造又驛散關之嘲潔徙朝陽之平爇
滅西高閣就安寧之石道禹導江河以靖四海經
紀厥績艾康萬里乃作頌曰頌後又有詩皆磨滅
不完其云遭遇隕納又云驛散關之嘲潔徙朝陽
之平爇刻畫適完非其訛謬而莫詳其義疑當時
人語與今異又疑漢人用字簡略假借不同爾故

錄之以俟博識君子治平元年六月十日書

右真蹟

後漢人闕銘

歲月未詳

真蹟

右漢人闕銘二其一曰永樂少府賈君闕其一曰

雒陽令王君闕二者皆不知為何人按漢書桓帝

母孝崇偃皇后居永樂宮和平元年詔置太僕少

府如長樂故事又按顏師古注地理志曰魚豢

真蹟

誤作

云漢火行忌水故去洛水加佳師古謂光武

以後始改為雒然則二人者皆後漢時人也又按

漢官儀長樂少府以宦者爲之則賈君者蓋亦宦者也治平元年九月十五日書

後漢文翁石柱記

歲月見本文

右漢文翁石柱記云漢初平五年倉龍甲戌旻天季月脩舊築周公禮殿始自文翁開建泮宮據顏有意益州學館廟堂記云按一無此字華陽國志文翁爲蜀郡守造講堂作一無此字石室一名玉堂安帝永初間烈火爲災堂及寺舍並皆焚燎惟石室獨存

至獻帝興平元年太守高朕於玉堂東復造一石

室為周公禮殿有意又謂獻帝無初平五年當是

興平

四字一作當如華陽志為興平

元年蓋時天下喪亂西蜀僻

遠年號不通故仍稱舊號也今檢范曄漢書本紀

初平五年正月改為興平顏說是也治平元年六

月十三日書

右真蹟

後漢文翁學生題名

右漢文翁學生題名凡一百有八人文學祭酒典

學從事各一人司儀主事各二人左生七十三人
右生三十人文翁在蜀教學之盛爲漢稱首其弟
子著籍者何止於此蓋其磨滅之餘所存者此爾
治平元年六月二十日書

右真蹟

後漢泰山都尉孔君碑

歲月見本文

右漢泰山都尉孔君碑云君諱宙字季將

二字一作秀特

孔子十九世之孫也年六十一延熹四年正月乙

未以疾卒

一有於家二字

其序官闕甚簡又或殘滅不完

但見其舉孝廉爲郎遷元城令遂爲泰山都尉爾其辭有云躬忠恕以及人兼禹湯之罪已宙人臣而引禹湯以爲比在今人於文爲不類蓋漢世近古簡質猶如此也治平元年閏五月二十一日書右真蹟

後漢孔宙碑陰題名

百人其親授業者爲弟子轉相傳授者爲門生今宙右漢孔宙碑陰題名漢世公卿多自教授聚徒

常數碑殘缺其姓名邑里僅可見者纔六十二人
其稱弟子者十人門生者四十三人故吏者八人
故民者一人宙孔子十九世孫爲泰山都尉自有
錄治平元年閏五月二十一日書

右真蹟

後漢孔君碑

歲月見本文

真蹟

右漢孔君碑其名字磨滅不可見而世次官闕
可考云孔子十九代孫潁川君之元子也舉孝廉
除郎中博昌長遭太守君憂服竟拜尙書侍郎治

書御史博陵太守遷下邳相河東太守建寧四年
十月卒其餘文字歷歷可讀以其斷絕處多文理
難續故不復盡錄然其終始略可見矣惟其名字
皆亡爲可惜也治平元年五月十日書

後漢孔德讓碑

一作 歲月見本文
碣

右漢孔德讓碑蓋其名已磨滅但云字德讓者宣
尼公二十世孫都尉君之子也仕歷郡諸曹史年
二十永興二年七月遭疾不祿碑在今兗州孔子

墓林中永興孝桓帝年號也一有都尉者其人二字

一作德讓早卒無事蹟可考余集錄所藏一有獨孔林闕二字

中漢一無此字碑最後得此遂無遺者蓋以其文字簡

少無事實故世人遺而不取獨余家有之也治平

元年閏五月二十日書右真蹟

後漢劉寬碑中平二年

右漢太尉車騎將軍特進遼鄉二字一作封照烈侯劉

公碑公諱寬有兩碑皆在洛陽余家集錄皆得之

其一故吏李謙所

一作等

立而此碑門生殷包等所

一無此字

立其所書與李謙等

一作碑

所載不異惟漢隸

難得當錄

二字一作故錄之

漢公卿

一有卒字

故吏門生各自

立碑以伸感慕惟見於此今人家碑碣非其子孫則他人不為立也治平元年六月十四日書

右真蹟

後漢太尉劉寬碑

同前

右漢太尉劉寬碑漢書有傳其官閥始卒與碑多同而傳載遷官次序頗略蓋史之所記善惡大事

官次雖小略不足爲失惟其繆誤與闕其大節不可不正碑云大將軍以禮脅命拜侍御史遷梁令三府並用博士徵皆不就司隸校尉舉其有道公車徵拜議郎司徒長史而傳但云大將軍辟五遷司徒長史今據碑止四遷爾博士未嘗拜也碑於長史下遂云入登侍中延熹八年地震有詔詢異而拜尙書遷南陽太守拜太中大夫復拜侍中屯騎尉宗正光祿勳遂授太尉傳至太中大夫始云

遷侍中其前自長史入登侍中史闕書也碑又云
固疾遜位拜光祿大夫遷衛尉復作太尉而傳云
以日食免拜衛尉以日食免當從傳爲正而不書
光祿大夫史闕也其餘皆同故不復錄 右集本

後漢太尉劉寬碑陰題名 歲月見本文

右漢太尉劉寬碑陰題名寬碑有二其故吏門生
各立其一也此題名在故吏所立之碑陰其別列
於後者在寬子松之碑陰也寬以漢中平二年卒

至唐咸亨元年其裔孫湖一作胡城公爽以碑歲久

皆仆於野爲再立之并記其世序嗚呼前世士大

夫世家著之譜牒故自中平至咸亨四百餘年而

爽能知其世以如此之詳也蓋自皇帝以來子孫

分國受姓歷堯舜三代數千歲間詩書所記皆一有

各有次序豈非譜繫源流傳之百世而一無此字不絕

歟此古人所以爲重也不然則士生於世皆莫自

知其所出而昧其世德遠近其所以異於禽獸者

僅能識其父祖爾其可忽哉唐世譜牒尤備士大夫務以世家相高至其弊也或陷輕薄婚姻附託邀求貨賂君子患之然而士子脩飭喜自樹立競競惟恐墜其世業亦以有譜牒而能知其世也今之譜學亡矣雖名臣巨族未嘗有家譜者然而俗習苟簡廢失者非一豈止家譜而已哉嘉祐八年七月二十九日書

右真蹟

後漢楊震碑

歲月未詳

右漢楊震碑首題云漢故太尉楊公神道碑銘文
字殘缺首尾不完其可見而僅成文者云聖漢龍
興神祇降祉乃生於公又云窮神知變與聖同符

鴻漸衡

一作于

門羣英雲集又云貽我三魚以章懿

德又云大將軍辟舉茂材除襄城令遷荊州刺史
東萊涿郡太守又云司徒太尉立朝正色恪勤竭
忠其餘字存者多而不復成文矣治平元年六月

十日書

右真蹟

後漢楊震碑陰題名

右漢楊震碑陰題名者二百九十人其餘磨滅不完者又十餘人余家所錄漢碑陰題名頗多或稱故吏門生弟子或稱從事曹掾之類其人皆著州縣邑里名字甚詳獨此碑所書簡略直云河間賈伯錡傅陵劉顯祖之類凡百九十人者皆然疑其所書皆是字爾蓋後漢時人見於史傳者未嘗有名兩字者也漢隸世所難得幸而在者多殘滅不

完獨此碑刻畫完具而隸法尤精妙甚可喜也治

平元年中伏日書

真蹟

後漢沛相楊君碑

歲月見本文

真蹟

右漢沛相楊君碑在閔鄉楊震墓側碑首尾不完
失其名字按後漢書震及中子秉秉子賜賜子彪
皆有傳又云震長子牧富波相牧孫奇侍中奇子
亮陽成亭侯又云少子奉奉子敷敷子衆務亭侯
又有彪子脩楊氏子孫載於史傳者止此爾不

知沛相爲何人也碑云孝順皇帝西巡以掾史召見拜郎中遷常山長史換犍爲府丞宰司累辟應於司徒州察茂才遷銅陽侯相後拜議郎五官中郎將沛相年五十六建寧元年六月癸丑遭疾而卒其終始尙可見而惜其名字亡矣治平元年六月十日書

後漢繁陽令楊君碑

熹平中

右漢繁陽令楊君碑首尾不完文字磨滅可識者

四百三十字不可識者六十一字碑云君遭叔父
太尉薨委榮輕舉吏民攀轅守闕上書運穀萬斛
助官賑貧以乞君還又云君一作富波君之子按漢
書楊震子牧爲富波相君乃牧子也叔父大尉者
秉也出米乞令前史所無惜其名字磨滅不可見
矣嘉祐八年十月廿三日書 右真蹟

後漢高陽令楊君碑 歲月未詳

右漢高陽令楊著碑首尾不完而文字尙可識云

司隸從事定潁侯相最後為善侯相善上一字磨滅不可見蓋其中間嘗為高陽令而碑首不書最後官者不詳其義也按楊震碑高陽令著震孫也

今碑在震墓側

一有也字

右真蹟

後漢楊君碑陰題名

真蹟

右漢楊君碑陰題名首尾不完今可見者四十餘人楊震子孫葬閩鄉者數世碑多殘缺此不知為何人碑陰其後有云右後公門生又云右沛

二字集本

作後
史 君門生沛君疑是沛相者自有碑而亡其名
字矣後公亦不知爲何人也治平元年六月十日
書

同前 真蹟

右漢楊君碑陰題名凡一百三十一人有稱故吏
者故民者處士者故功曹史者故門下佐者類例
不一似當時人各隨意書之而文字磨滅僅可讀
其姓名字俱完可識者八十三人其餘或在或亡

蓋後漢楊震墓域中碑也楊氏墓在閬鄉有碑數
片皆漢世所立余家集錄得其四震及沛相繁陽
高陽令碑并得碑陰題名然一有嚮字得時參錯不知
爲何碑之陰也其名氏可見者當時皆無所稱述
顧其人亦不足究考第以漢隸真蹟金石所傳者
至今類多磨滅可惜故錄之爾治平元年正月晦
日書

後漢碑陰題名

右漢碑陰題名在閔鄉楊震墓側文字磨滅不復
可考其僅可見者曰候長汾陰趙遺子宣候上滅
一字又曰故督郵曹史縣功曹鄉部吏柏昱等人
名鄉上又滅一字又曰西鄉亭長柏昱子政又曰
鄉亭長翟國相如鄉上又滅一字又曰麟都亭長
陰定安定谷口亭長方文雅方上又滅一字東門
亭長梁忠子孝四望亭長吳鴻子名麟武亭長常
嵩君宣其餘缺裂不完蓋楊氏子孫當時皆葬閔

鄉碑碣往往磨滅此不知爲誰碑也治平五年五月廿日謝雨致齋於太社書

右真蹟

後漢楊公碑陰題名

真蹟

右漢楊公碑陰題名楊氏世葬閩鄉墓側皆有碑今其存者四余家集錄皆得之乃太尉沛相高陽繁陽令也此碑陰者不知爲何人碑文字殘缺其僅存者十五人又滅其一其在者十四人曰懷陵圉令相蔣禧字武仲宜祿長蕭劉瑞字仲祐孝廉

杵秋劉旭字子明太官日丞譙曹臻字建國辭曹
史鄆公孫銀字山根門下書佐史韓純字子敬豐
畢珮字廣世鄆孟縱字河雒決曹書佐鄆公孫暘
字元暘皆稱故吏又有故吏一無贊陳俊字仲顯
斡夏陽字儀公斡兒銀字伯玉杵秋劉順字子選
沛周儀字帛民凡五人皆不著職一有但稱而孟
縱字河雒周儀字帛民文字皆完非訛謬而莫曉
其義也治平元年六月十四日書

後漢殘碑陰 歲月未詳

右漢殘碑陰前後 二字亦作亦 磨滅不知為何人碑其

知為漢碑者蓋其隸字非漢人莫能為也其字僅

可見者尙數十而姓名完者九人曰王伯鄉趙仲

方賈元周王景陽賈元輔宗石處王仲宣馬安國

王通國皆無官號邑里莫知為何人惟漢隸在者

少為難得故錄之治平元年五月十八日書 右真蹟

後漢朔方太守碑陰 歲月見本文

右漢朔方太守碑陰題名

此字一無

云永壽二年朔方

太守上郡仇君察察下減一字除郎中大曲長大
下又減一字延熹四年九月乙酉詔書遷衙令五
年正月到官奉見明府見下又減一字立祠刊石
表章大聖之遺靈永示來世之未一作未下又減
一字謹出錢千千下又減兩字者下行因紀姓名
一無據此乃當時脩廟出錢人爾今其姓名徃徃
七字可見云衙鄉三老時勤伯秋上官鳳季方錄事史

楊禹孟布衙主記掾楊綬子長門下功曹裴篤伯

安倉曹椽任就子優又有集曹椽軍一作君假司馬

之類名字多不完其所出錢不過三百至五百蓋

漢世物輕幣重今華嶽孔子廟碑陰所列亦皆如

此其所立祠蓋不知為何廟也治平元年夏至日

書 右真蹟

後漢劉曜碑 一有并 歲月未詳 陰二字 真蹟

右漢劉曜碑在今鄆州界中文字磨滅僅有存者

云諱曜字季尼年七十三其餘爵里官闕卒葬歲月皆不可見字爲漢隸亦不甚工惟其銘云天臨大漢錫以明慙碑首題云漢故光祿勳東平無鹽劉府君之碑以此知爲漢碑也治平元年四月一日書

後漢北海相景君銘

歲月見本文

右漢北海相景君銘其碑首題云漢故益州太守北海相景君銘其餘文字雖往往可讀而漫滅多

不成文故君之名氏邑里官閥皆不可考

一作其見

可見者云惟漢安二年北海相任城府君卒城下一字不可識當爲景也漢功臣景丹封櫟陽侯傳子尚尚傳子苞苞傳子臨以無嗣絕安帝永初中鄧太后紹封苞弟遠爲監亭侯以續丹後自是而後史不復書而他景氏亦無顯者漢安順帝年號也君卒於順帝時蓋與遠同時人也碑銘有云不永麋壽余家集錄三代古器銘有云眉壽者皆爲

康蓋古字簡少通用至漢猶然也治平元年四月

二十九日書

右真蹟

後漢謁者景君碑

右漢景君碑尤磨滅惟謁者任城景君數字尙完其餘班班可見者皆不能成文故其年世壽考功行卒葬莫可考也蓋漢隸今尤難得其磨滅之餘

可惜爾

右集本

後漢景君石郭銘

右景君石郭銘者余旣得前景君碑又得此銘皆
在任城不知一景君乎將任城景氏之族多耶文
字磨滅不可考故附於此熙寧三年正月朔旦山
齋記 右真蹟

後漢袁良碑 歲月見本文

右漢袁良碑云君諱良字卿卿上一字磨滅陳國
扶樂人也厥先舜苗世爲封君周與虞闕父自此
而滅又云滿爲陳侯至玄孫濤塗以字立姓曰袁

自此又滅又云當秦之亂隱居河洛高祖破項實
從其冊天下既定還宅扶樂蓋不知爲何人也又
云孝武征和三年曾孫斬賊先勇拜黃門郎曾孫
滅其名賊下亦一作滅一字又曰封關內侯食遺
鄉六百戶薨子經嗣經薨子山嗣傳國三世至王
莽而絕君卽山之曾孫也舉孝廉郎中謁者將作
大匠丞相令廣陵太守討江賊張路等威震徐方
謝病歸家孝順初初下數字滅一作滅又云府舉

君拜議郎符節令其後又云永建六年二月卒其
碑首題云漢故國三老袁君碑而碑文有使者持
節安車又有几杖之尊袒割之養君實饗之之語
以此知良嘗爲三老矣其餘磨滅雖時時可讀而
不能次第也又云帝御九龍殿引對飲宴九龍殿
名惟見於此治平元年五月二十九日夏至假書

右真蹟

後漢張平子墓銘

永和四年

右漢張平子墓銘世傳崔子玉撰并書按范曄漢書張衡傳贊云崔子玉謂衡數術窮天地制作侔造化此銘有之

四字一作今銘有此語

則真子玉作也其刻

石爲二本一在南陽一在向城天聖中有右班殿直趙球者知南陽縣事因治縣署毀馬臺得一石有文驗之迺斯銘也遂龕於聽事之壁其文至凡百君子而止其後

一有半字

亡矣其在向城者今尙書

屯田員外郎謝景初得其半於向城之野自凡百

君子已上則亡矣

三字一作其
無判亡矣

今以二本相補續

其文遂復完而闕其最後四字然則昔人爲二本

者不爲無意矣據徐方回所記二十一字迺趙球

所得南陽石之亡者

二十一字一作唐寶應中有
徐方回者別得二十一字云

是銘最後文疑球所
得南陽石之亡者爾

今不復見則又亡矣惜哉嘉

祐八年歲在癸卯十月十八日書

右真蹟

六一題跋卷之二

終

六一題跋卷之三

後漢費鳳碑

歲月見本文

右漢費鳳碑云

集本有君諱鳳二字

字伯蕭梁相之元子也

集本無也字

漢安二年舉孝廉拜郎中除陳國新平長

又云試守故障長其文班班可見而卒葬年壽皆

不載其後悉為五言韻語其略曰不悟

集本作語

奄忽

終藏形而匿景

集本作影

耕夫釋耒耜桑女投鉤筥道

阻而且長起坐淚如雨其文既非工故不悉錄

入字

集本作文字工拙古今皆然惟漢隸難得故錄爾

熙寧二年十一月十六

日山齋書

右真蹟

略曰

一作云

後漢武班碑

歲月見本文

右漢班碑者蓋其字畫殘滅不復成文其氏族州里官閥卒葬皆不可見其僅見者曰君諱班爾其首書云建元年大歲在丁亥而建下一字不可識以漢書考之後漢自光武至獻帝以建名元者七謂建武建初建光建康建和建寧建安也以歷推

之歲在丁亥乃章帝章和元年後六十一年桓帝
卽位之明年改本初二年爲建和元年又歲在丁
亥則此碑所缺一字當爲和字真蹟無此六字迺建和元
年也碑文缺滅者十八九惟亡者多而存者少尤
爲可惜也故錄之治平元年四月二十日書右集本
後得別本模榻龕明始辨其一二云武君諱班乃
易去前本熙寧二年九月朔日記

後漢中常侍費亭侯曹騰碑

歲月見本文真蹟

右漢中常侍費亭侯曹騰碑文字磨滅其粗可見者云維建和元年七月二十二日己巳皇帝若曰其建費亭侯之國其餘不可識也建和桓帝即位之元年也後三十七年獻帝中平元年騰養子操始為騎都尉

集本有領兵二字

擊黃巾矣治平元年六月

十日書

後漢司隸楊君碑

歲月見本文

右漢司隸校尉楊厥碑云惟靈定位川澤攸同

澤有所注川有所通余谷之川其澤南隆八方所
達益城爲克高祖受命興於漢中道由子午出散
入秦建定帝位以漢詆焉後以子午塗路澀難更
隨圍谷復通堂光凡此四道堦隔允艱至於永平
其有四年詔書開余鑿通石門中遭元二西夷虐
殘橋梁斷絕子谷復循於是故司隸校尉犍爲武
陽楊厥字孟文深執忠伉數上奏請廢子由斯得
其度經至建和二年漢中太守王升字稚紀嘉君

明知美其仁賢勒石頌德以明厥勲其辭大略如此其刻畫尙完可讀大抵述厥脩復斜谷路爾但其用字簡省復多舛繆惟以𠄎爲坤以余爲斜漢人皆爾獨詆字未詳永平明帝建和桓帝年號也

右集本

後漢樊常侍碑

歲月見本文

右漢樊常侍碑云君諱安字子佑南陽湖陽人也君幼學治韓詩論語孝經歷中黃門拜小黃門小

黃門右史遷藏府令中常侍年五十有六永壽四

年四

石本
作二

月甲辰卒其先爲中黃門後爲小黃門

又爲小黃門右史蓋漢官之制今不詳其次序也

余少家漢東天聖四年舉進士赴尙書禮部道出

湖陽

一本
作間

見此碑立道左下馬讀之徘徊碑下者

久之後三十年始得而入集錄蓋初不見錄於世

自予集錄古文時人稍稍知爲可貴自此古碑漸

見收采也

古集本

後漢郎中鄭固碑

固一本
作宣

歲月見本文

右漢郎中鄭固碑文字磨滅其官闕卒葬年月皆莫可考其僅可見者云君諱固字伯堅孝友著於閨門至行立乎鄉黨初授業於歐陽仕郡諸曹掾史主簿督郵五官掾功曹又曰忠以衛上清以自脩其餘殘缺不復成文又云延熹元年二月詔拜而不見其官惟其碑首題云漢故郎中鄭君之碑以此知其官至郎中爾漢隸刻石存於今者少惟

余以集錄之勤所得爲獨多然類多殘缺一作不減

完蓋其難得而可喜者其零落之餘尤爲可惜也

延熹元年二月之下一本云詔拜郎中非其好

也以疾錮辭年四十二遭命殞身而中間又有

逡遁退讓之語遁當作循錮當作固疑漢人用

字多假借又疑以疾錮辭謂疾已堅固若云以

疾篤辭覽者詳之

右集本

後漢田君碑

歲月見本文

真蹟

右漢田君碑今在沂州其名字皆已磨滅惟云其先出自帝舜之苗裔自完適齊因以爲氏乃知爲姓田爾又云周秦之際家於東平陽君總角脩韓

詩京氏易

真蹟作易京氏

究洞神變窮奧極微爲五官掾

功曹州從事辟太尉延熹二年辛亥詔書泰山瑯耶盜賊未息州郡吏有仁惠公清撥煩整化者試守滿歲爲真州言名時牧劉君知君宿操表上試守費自此以後殘缺不可次第而隱隱可見蓋無

年壽卒葬月日而有故吏薛咸等立石勒銘之語
乃費縣令長德政去思碑爾治平元年六月二十
九日書

後漢孫叔敖碑

延熹三年

右漢孫叔敖碑云名饒字叔敖而史記不著其名
而見於他書者亦皆曰叔敖而已微斯碑後

世遂不復知其名饒也此

集本無此字

碑世亦

集本作所

罕

傳余以集錄二十年間求之博且勤乃得之然則

世之未見此碑者猶不知為名饒也謂余集古為

無益可乎

集本無此九字

真蹟

後漢王元賞碑

歲月見本文

右漢王元賞碑云君諱某字元賞御史君之孫茂才君之子也歷秦及漢有國有家宰相牧守踵武相襲又曰遭父喪以孝立稱土堦環堵兼業竝受門徒雨集盛於洙泗又云郡察孝廉郎中謁者宛陵丞封丘令母憂去官服祥辟司空府延熹四年

五月辛酉遭命而終其文字磨滅隱隱可見者如此其名既亡又不序其姓惟其銘云於惟王君以此知其姓王爾

右集本

後漢祝睦碑

歲月見本文

真蹟

右漢祝睦碑云君諱睦字元其下遂缺滅不能成文惟其官壽年月可見云賓于王庭除北海長史潁川鄆令辟司空府北軍中候拜大尙書尙書僕射遷常山相山陽太守年六十有八延熹七年八

月丁巳卒睦有二碑皆在今南京虞城縣此碑不見世次而隱隱有云其先高辛爾其後碑則頗完故錄於次也治平元年六月立秋日書

後漢祝睦後碑

延熹七年

右漢祝睦後碑其前碑不知所立人名氏兩碑所載官闕壽考年月悉同而此碑有立碑人名氏及睦世次云故吏王堂等竊聞下有述上之功臣有敘君之德又曰君兆自黎辛祝融苗胄鄭有祝聃

君其胤也其餘文字亦完可讀二銘皆以三言爲
文而後銘尤完云穆我君邦之陽資五就闡道綱
綱下滅一字表微準樞衡稽列宿覽四方德合乾
道應皇領二郡曜重光化流洽緝幽昌性天約元
用長頌聲作謠令香功烈著遺椒芳存覲榮淪弗
忘其後二句磨滅難詳故錄其成文以見其雅質
亦可佳也治平元年六月立秋日書

右真蹟

後漢衡方碑

歲月見本文

真蹟

右漢衡方碑云府君諱方字興祖其先伊尹在殷
號稱阿衡因而氏焉又曰州舉孝廉除郎中卽丘
侯相膠東令州舉尤異遷會稽東部都尉又拜議
郎北平太守遷潁川太守又曰拜步兵校尉年六
十有三建寧元年二月五日癸丑卒於是海內門
生故吏采嘉石樹靈碑鐫茂伐祕將來此其始終
之大略其餘歷歷可見而時亦磨滅以其文多不
備錄也治平元年六月三日書

後漢冀州從事張表碑

歲月見本文

真蹟

右漢冀州從事張表碑云君諱表字元異其碑首
題云漢故冀州從事張君碑而文爲韻語敘其官
閔不甚詳但云春秋六十四以建寧元年三月癸
巳寢疾而終其辭有云仕郡爲督郵鷹撮盧擊是
以狗喻人集本有也字又有畔桓利正之語蓋漢人猶
質不嫌取類於鷹犬畔桓疑是盤桓集本有漢時二字文
字簡少假借爾治平元年六月廿九日書

後漢竹邑侯相張壽碑

歲月見本文

右漢竹邑侯相張壽碑云君諱壽字仲吾其先晉

大夫張老盛德之裔孝友恭懿明允篤信博物多

識獵

一作略

涉傳記臨疑獨照確然不撓有孔甫之

風舉孝廉除郎中給事謁者遷竹邑侯相年八十

建寧元年五月辛酉卒其大略可見者如此其餘

殘缺或在或亡亦班班可讀爾

右集本

後漢金鄉守長侯君碑

歲月見本文

真蹟

右漢金鄉守長侯君碑云君諱成字伯盛山陽防
東人也其先出自幽岐周文之後封於鄭鄭共仲
賜氏曰侯厥胤宣多以功佐國漢之興也侯公納
策濟太上皇於鴻溝之阨諡曰安國君曾孫酺封
明統侯光武中興玄孫霸爲臨淮太守轉拜執法
右刺姦五威司命大司徒公封於陵侯枝葉繁茂
或家河洧或邑山濟君卽上黨太守之弟郡請署
主簿督郵五官掾功曹守金鄉長建寧二年四月

癸酉卒年八十一碑文首尾皆完故得詳其世次
其云上黨太守不見其名按漢書執法左右刺姦
五威司命皆王莽官名侯霸列傳云霸莽時爲隨
令遷執法刺姦而未嘗爲五威司命後事光武代
伏湛爲大司徒封關內侯旣薨光武下詔追封則
鄉侯而此碑言封於陵侯未知孰是據碑言刺姦
司命爲光武時官蓋碑文之繆矣治平元年四月
二十九日書

後漢慎令劉君墓碑

建寧四年

右漢慎令劉君墓碑在今南京下邑其名已磨滅
其字伯麟少罹艱苦身服田畝舉孝廉除郎中辟
從事司徒掾遷慎令卒年六十有二其銘曰於惟
君德忠孝正直至行通洞高明柔克鬼神福謙受
茲介福知命不延引輿旋歸忽然輕舉志激拔葵
人皆有亡貴終譽兮歿而不朽垂名著兮余家漢
碑常患其銘多缺滅而斯銘偶完故錄之

右真蹟

後漢北軍中候郭君碑

歲月見本文

右漢北軍中候郭君碑其名字磨滅云元城君第
四子也其先蓋周之胄緒枝葉雲布列於州郡自
東郡衛國家於河內汲兄竹邑侯相次尚書侍郎
次濟北相順弟臨沂長次徐州刺史次中山相次
雒陽令君爲五官掾功曹司隸中都官從事三辟
將軍府舉廉比陽長復辟司徒拜北軍中候年六
十有六建寧四年九月丙子卒其於兄竹邑侯相

上一字缺滅不完疑是惠字其下又云順弟莫曉
其義豈漢人謂兄弟爲此語邪故闕其疑以俟知
者治平元年六月廿九日書

右真蹟

後漢司隸從事郭君碑

歲月見本文

右漢司隸從事郭君碑云君諱究汲人也元城君
之孫雒陽令之適歷主簿督郵五官掾功曹守令
長辟司隸從事部郡都官春秋二十八而卒中平
元年歲在甲子三月而葬據北軍中候碑爲元城

君子而弟為雒陽令考其世次皆同前世碑碣但
書子孫而不及兄弟惟郭氏碑載其兄弟甚詳蓋
古人譜牒既完而於碑碣又詳如此可見其以世
家為重不若今人之苟簡也治平元年六月廿九

日書

右真蹟

後漢魯峻碑

歲月見本文

集本

右漢魯峻碑云君諱峻字仲嚴山陽昌邑人監營
謁者之孫脩武令之子治魯詩顏氏春秋舉孝廉

除郎中謁者河內太守丞辟司徒司空府舉高第
御史東郡頓丘令遷九江太守拜議郎太尉長史
御史中丞司隸校尉遭母憂自乞拜議郎服竟還
拜屯騎校尉以病遜位熹平元年卒門生于商等
二百三十人謚曰忠惠父其餘文字亦粗完故得
遷拜次序頗詳以見漢官之制如此惟云遭母憂
自乞拜議郎又其最後爲屯騎校尉而碑首題云
漢故司隸校尉忠惠父魯君碑二者莫曉其義治

平元年四月二十三日

後漢玄儒婁先生碑

歲月見本文

右漢玄儒婁先生碑云先生諱壽字元考南陽隆

人也祖太常博士父安貧守賤不可營

集本作榮

以祿

先生童孩多奇岐嶷有志好學不厭不飭小行善

與人交久而能敬榮沮溺之耦耕甘山林之杳藹

又曰有朋自遠冕紳莘莘講習不倦年七十有八

熹平三年二月甲子不祿今光化軍乾德縣圖經

載此碑景祐中余自夷陵貶所再遷乾德令按圖
求碑而壽有墓在穀城界中余率縣學生親拜其
墓見此碑在墓側遂據圖經遷碑還縣立於敕書
樓下至今在焉治平元年六月十三日書

右真蹟

後漢郭先生碑

真蹟

歲月未詳

右漢郭先生碑云諱輔字輔成其先出於王季之
中子爲文王卿士食采於虢後世謂之郭歷戰國
秦漢子孫流分來居荆土先生其少也孝友而悅

學其長也寬舒如好施是以宗親歸懷鄉鄰高尚
年五十有二遇疾而終其以而爲如及用鄉鄰字
與婁壽碑同蓋漢人如此爾治平元年六月二十
二書

又 集本

右不見書撰人名氏碑在襄州穀城縣界中其辭
云先生諱輔字輔成其先出自有周王季之中子
爲文王卿士食采於虢至於武王錫而封之後世

謂之郭春秋之時爲晉所并歷戰國秦漢子孫派
分來居荆土氏國立姓焉傳云聖賢之後必有達
者先生應焉孝友而說學其長也寬舒如好施是
以宗親歸懷鄉邨高尙年五十有二遇疾而終其
文字古質蓋漢之碑也其用鄉邨字與漢婁壽碑
同其曰寬舒如好施蓋以如字爲而也春秋書星
隕如雨釋者曰如而也然施於文章以如爲而始
見於此也

後漢桂陽太守周府君紀功銘

熹平中

此君檢漢書無之今碑石缺不見其名惜乎遂不見於世也南人紀其所修瀧水卽韓文公所謂昌樂瀧者是也至今以爲利祠宇甚嚴云

右集本

後漢桂陽周府君碑

熹平中

右漢桂陽周府君碑按韶州圖經云後漢桂陽太守周府君碑按廟在樂昌縣西一百一十八里武溪上武溪驚湍激石流數百里昔馬援南征其門

人轅寄生善吹笛援爲作歌和之名曰武溪深其
辭曰滔滔武溪一何深鳥飛不渡獸不能臨嗟哉
武溪何毒淫周使君開此溪下合真水桂陽人便
之爲立廟刻石又云碑在廟中郭蒼文今碑文磨
滅云府君字君光而名已訛缺不可辨圖經但云
周使君亦不著其名後漢書又無傳遂不知爲何
人也按武水源出郴州臨武縣鷓鴣石南流三百
里入桂陽而桂陽真水

一有梨
溪二字

盧溪曹溪諸水皆

與武水合流其俗謂水湍峻爲瀧韓退之詩云南
下昌樂瀧卽此水也碑首題云神漢者如唐人云
聖唐爾蓋當時已爲此語而史傳他書無之獨見
於此碑也

右集本

後漢桂陽周府君碑後本

熹平中

右漢桂陽周府君碑余初得前本恨其名遂磨滅
後有國子監直講劉仲章者因出其碑而爲余言
前爲樂昌令因道府君事云名憬問其何以見之

云碑刻雖闕尙可識也乃以此碑并陰遺余蓋前
本特模者不工爾又余初以韓集云昌樂瀧疑其
誤乃改從樂昌仲章曰不然縣名樂昌而瀧名昌
樂其舊俗所傳如是韓集不誤也乃知古人傳疑
而慎於更改者以此

右集本

後漢費府君碑

歲月未詳

集本

右漢梁相費府君碑其名字若云諱況字仲慮而
況疑爲汎慮疑爲寬其官閥可見者爲蕭令九年

沛有蝗獨不入其界國以狀聞朝廷嘉諸拜梁相
春秋八十卒其銘頗簡而文字龕完云𪚩𪚩顯祖
厥德懿鑠播勛於前丕碩基業遺愛於民福流於
後胙自此磨滅不可識者八字其卒章云功烈休
矣來昆戮力而穆字爲𪚩古文多然

後漢郎中王君碑

光和元年

右漢郎中王君碑文字磨滅不復成文而僅有存
者其名字官闕卒葬年月皆莫可考惟其碑首題

云漢故郎中王君之銘知君爲漢人姓王氏而官
爲郎中爾蓋夫有形之物必有時而弊是以君子
之道無弊而其垂世者與天地而無窮顏回高卧
於陋巷而名與舜禹同榮是豈有託於物而後傳
邪豈有爲於事而後著耶故曰久而無弊者道隱
而終顯者誠此君子之所貴也若漢王君者託有
形之物欲垂無窮之名及其弊也金石何異乎瓦
礫治平元年四月晦日書

右真蹟

後漢太尉陳球碑

歲月見本文

真蹟

右漢太尉陳球碑云君諱球字伯真廣漢太守之
元子也又云除郎中尙書符節郎慎陵園令換中
東城門候遷繁陽令拜侍御史其後又云拜將作
大匠其餘磨滅僅存按後漢書球傳云父豐廣漢
太守陽嘉中球舉孝廉稍遷繁陽令太尉楊秉表
球零陵太守後累拜司空光和元年遷太尉坐日
食免復拜光祿大夫與司徒劉郃等謀誅宦官曹

節等不果下獄死球在零陵破賊胡蘭朱蓋有功
威著南邦今碑破蘭蓋事班班可讀與傳皆合惟
不著誅宦官事至其卒時文字磨滅不可識惟云
六十有二亦與傳合予所集錄古文與史傳多異
惟此碑所載與列傳同也治平元年四月晦日書

後漢敬仲碑

歲月見本文

右漢敬仲碑者其姓名字皆不可見惟其初有敬
仲二字尙可識故以寓其名爾蓋疑其人姓田氏

也大抵文字磨滅比其他漢碑尤甚字可識者頗多第不成文爾惟云州郡課最臨登大郡又云居喪致哀又云司隸從事治書侍御史又云光和四年閏月庚申此數句粗可讀爾其餘字畫屢完者以漢隸今爲難得錄之爾治平元年閏五月廿九

日書

右真蹟

後漢無名碑

此與前跋大槩同

右漢無名碑文字磨滅其姓名字皆不可見其

僅可見者云州郡課最臨登大郡又云居喪致哀
曾參閔損又曰辟司隸從事拜治書侍御史又曰
奮乾剛之嚴威揚哮虎之武節又曰年六十三光
和四年閏月庚申遭疾而卒其餘字畫尙完者多
但不能成文爾夫好古之士所藏之物未必皆一作
能適世之用惟其埋沒零落之餘尤以爲可惜此
好古之僻也治平元年六月五日書 右真蹟

後漢豪長蔡君頌碑 光和四年 真蹟

右漢豪長蔡君頌碑在鎮府故天章閣待制楊畋嘗爲余言漢時隸書在者此爲最佳畋自言平生惟學此字余不甚識隸書因畋言遽遣人之常山求得之遂入於錄

後漢唐君碑

歲月見本文

右漢唐君碑其名已磨滅其字正南云

集本作云字正南

潁川鄆人也其先出自慶都感赤龍生堯王有天
下苗胄枝分相土視居因氏唐焉君父孝廉郎中

早卒君繼厥緒耽道好古敦書味詩守舞陽丞穎
陽令察能治劇遷豫章其後遂復磨滅雖文字班
班可見而不能得其次序其後又云換君昌陽令
吏民慕戀牽君車輪不得行君臣流涕道路琅玕
是故從事郡掾刊石樹頌歌君之美據此蓋縣令
去思碑爾其後又云光和六年二月壬午朔二十
五日丙午則知唐君爲後漢時人矣治平元年閏
五月二十八日

右真蹟

後漢朱龜碑

歲月見本文

右漢朱龜碑云字伯靈察孝廉除郎中尚書侍郎
以將事去官於時幽州州下滅一字夷侵犯以君
爲御史中丞討伐其後磨滅又云鮮卑侵犯障塞
復舉君拜幽州刺史年六十四光和六年卒龜之
事迹不見史傳其僅見於此碑者如此碑在今毫
州界中云將事去官莫曉其語治平元年六月十

四日書

右真蹟

後余守亳州徙碑置州學中

後漢小黃門譙君碑

歲月見本文

右漢小黃門譙君碑云君諱敏字漢達年五十七
中平二年卒其文不甚磨滅而官闕無所稱述惟
云肅將王命守靜韜光以遠悔咎而已後漢宦者
用事靈帝時尤盛敏卒之歲張讓等十二人封侯
於斯之時能守靜遠悔是亦可嘉然敏以小黃
門而立碑稱頌於此可見宦官之盛也治平元年

四月三日書

右真蹟

後漢熊君碑

歲月見本文

右漢熊君碑云君諱喬字舉舉上減一字其官闕不可詳考其僅可知者劉表時爲綏民校尉後遷騎都尉建安二十一年卒享年七十有一其云治歐羊尙書其字非訛闕而以陽爲羊蓋古文字少故須假借至漢字已備而猶假用何哉後云太歲在申申上減一字以曆推之當是丙申又云碑師

春陵福造福上滅一字當是其姓其書顯字皆爲
顯按許慎說文顯從焜聲而轉爲累其失遠矣莫
曉其義也

右集本

後漢俞鄉侯季子碑

歲月未詳

右漢俞鄉侯季子碑云君諱熊字孟下闕一字廣
陵海西人也厥祖天皇大帝垂精接感篤生聖明
子孫享之分源而流枝葉扶疎出王別胤受爵列
土封侯載德君光武皇帝之玄廣陵王之孫俞鄉

侯之季子也繇是而後文字缺滅其稍稍可讀者
時得其一二云六籍五典如源如泉旣練州郡卷
舒委隨化流南城政猶北辰三祀有成來臻我邦
仁恩如冬日威猛烈夏日吏民愛若慈父畏如神
明其後又云採摭謠言作詩三章據碑文無卒葬
年月而其辭若此似是德政碑按後漢書光武皇
帝子曰廣陵思王荆荆子元壽等四人皆封鄉侯
史略而不載其名俞鄉侯者不知爲誰也思王荆

之第幾子也天皇大帝之語自漢以來有矣

右集本

後漢武榮碑 歲月未詳

右漢武榮碑云君諱榮字舍

集本作舍

和治魯詩經韋

君章句孝經論語漢書史記左氏國語為州書佐

郡曹史

集本作文學

主簿督郵五官掾功曹年三十六

南蔡府君察舉孝廉執金吾丞孝桓大憂屯守玄

武闕加遇害氣遭疾殞靈其餘文字殘缺不見其

卒葬年月又不著氏族所出惟其碑首題云漢故

執金吾丞武君之碑云治平元年五月六日書右真

後漢秦君碑首歲月見本文

漢碑今存者少此篆亦與今文小異勢力勁健

可愛蔡君謨題

右漢熹平中碑在南陽界中字已摩或作磨非滅不可

識獨其碑首字大僅存其筆畫頗奇偉蔡君謨甚

愛之此君謨過南都所題乃皇祐三年也今一紀

矣嘉祐八年九月十七日書

右真蹟

又 此集本與真蹟頗不同故兩存

右漢秦君碑首題云漢故南陽太守秦君之碑秦君不知爲何人碑在南陽界中字已磨滅不可識獨其碑首字大僅存其筆畫頗奇偉蔡君謨甚愛之

後漢元節碑

歲月未詳

右漢元節碑文字磨滅不見其氏族其可見者纔

數十字爾云君

集本無此字

諱立字元節其先出自伊

尹其餘不復成文其銘云於穆從事疑其姓伊而為從事也碑無年月而知為漢人者以其隸體與他漢碑同爾治平元年五月三日書

右真蹟

後漢殘碑

歲月未詳

真蹟

右漢殘碑不知為何人所存者纔三十二字不復成文惟云高字幼知其名高又云漢一有中字興復知為後漢時人而隸字在者甚完體質淳勁非漢人

莫能爲也故錄之

後漢天祿辟邪字

歲月未詳

右漢天祿辟邪四字在宗資墓前石獸膊上按後漢書宗資南陽安衆人也今墓在鄧州南陽界中墓前有二石獸刻其膊上一曰天祿一曰辟邪余自天聖中舉進士往來穰集本作襄鄧間見之道側迨今三十餘年矣其後集錄古文思得此字屢求於人不能致尙書職方員外郎謝景初家於鄧爲余

模得之然字畫

集本作或

訛缺不若余見時完也按黨

錮傳云資祖均自有傳今後漢書有宋均傳云南

陽安衆人而無宗均傳疑黨錮傳轉

集本無此字

寫宋

為宗爾蜀志有宗預南陽安衆人豈安衆當漢時

有宗宋二族而字與音皆相近遂至訛謬邪史之

失傳如此者多矣嘉祐八年臘日書

六一題跋卷之三

終

六一題跋卷之四

魏受禪碑

歲月見本文

右魏受禪碑世傳為梁鵠書而顏真卿又以為鍾

繇書莫知孰是按漢獻帝紀延康元年十月乙卯

皇帝遜位魏王稱天子又集本無此字按魏志是歲十

一月葬士卒死亡者猶稱集本有王字令是月丙午集本

寅作漢帝使張愔奉璽綬庚午王升壇受禪又是月

癸酉奉漢帝為山陽公而此碑云十月辛未受禪

於漢三家之說皆不同今據裴松之注魏志備列
漢魏禪代詔冊書令羣臣奏議甚詳蓋漢實以十
月乙卯策詔魏王使張惛奉璽綬而魏王辭讓往
返三四而後受也又據侍中劉廙奏問太史令許
芝今月十七日巳未可治壇場又據尚書令桓階
等奏云輒下太史令擇元辰今月二十九日可登
壇受命蓋自十七日巳未至二十九日正得辛未
以此推之漢魏二紀皆繆而獨此碑爲是也漢紀

乙卯遜位者書其初命而略其辭讓往返遂失其實爾魏志十一月癸卯猶稱令者當是十月衍一字爾丙午張愔奉璽綬者辭讓往返容集本作殆有之也惟庚午升壇最爲繆爾癸卯去癸酉三十一日不得同爲十一月此尤繆也禪代大事也而二紀所書如此則史官之失以惑後世者可勝道哉嘉祐八年九月十七日書

右真蹟

魏公卿上尊號表

黃初元年

右魏公卿上尊號表唐賢多傳爲梁鵠書今人或謂非鵠也乃鍾繇書爾未知孰是也嗚呼漢魏之事讀其書者可爲之流涕也其鉅碑偉字其意惟恐傳之不遠也豈以後世爲可欺歟不然不知耻者無所不爲乎

右真蹟

魏鍾繇表

歲月見本文

右鍾繇法帖

二字集本作表

者曹公破關羽賀捷表也其

後書云建安二十四年閏月九日南蕃東武亭侯

鍾繇上集賢校理孫思恭精於曆學余問孫君建安二十四年閏在何月思恭爲余以漢家所用四分乾象曆推之是歲己亥二曆皆閏十月而陳壽三國志所書時月雖爲簡略然以思恭言考之則合按魏志是歲冬十月軍還洛陽其下遂書孫權請討關羽自効於吳志則書閏月權討羽以吳魏二志參較是閏十月矣吳志又書十二月權獲羽及其子平魏志明年正月乃書權傳羽首至洛陽

蓋二志相符乃權以閏十月方征羽至十二月獲

之明年正月始傳首至洛

集本有陽字

理可不疑然則

鍾繇安得於閏十月先賀捷也由是此表可疑爲
非真而今世盛行復有兩本字大小不同小字差
類繇書然不知其果是否姑竝存之以俟識者治

平元年七月廿六日書

右真蹟

又 集本

右魏鍾繇書其辭云戎路兼行履險冒寒因述曹

仁徐晃破關羽事其後題云建安二十四年閏月
九日南蕃東武亭侯臣繇上按建安二十四年冬
曹公軍於摩陂而仁晃破羽後未嘗出征履險冒
寒之役又古人牋啓不書年此二事可疑又云羽
已被手刃據三國志羽圍曹仁於樊爲仁所敗而
走後爲孫權兵斬於沮與此帖不同

魏劉熹學生冢碑

歲月未詳

右魏劉熹學生冢碑在襄州穀城縣界中余爲乾

德令時嘗以公事過穀城見數荒冢在草間傍有古碑傾側半埋土中間其村人爲何人冢皆不能道而碑文磨滅不暇讀而去後數年在河北始集錄古文思嚮所見穀城碑疑爲漢碑求之又數年乃獲按襄州圖經云學生冢在縣東北水經注云魏濟南劉熹字德怡博學好古立碑載生徒百餘人其不終業而卒者葬于

集本
作於

此號學生冢今碑

雖殘缺而熹與生徒名字往往尙可見蓋余昔所

見乃學生冢而碑魏時碑也熹穀城令也治平元

年正月十日書

右真蹟

魏賈逵碑

歲月未詳

右魏賈逵碑魏志逵傳云逵為絳邑長為賊郭援
所攻絳人與援約不害逵乃降而援欲以逵為將
怒逵不肯叩頭欲殺之絳人乘城呼曰負集本要
作若殺我賢君寧俱死援義之遂不殺又按裴松之注
引魏略云援捕得逵怒不肯拜促斬之諸將覆護

囚於壺關土窖中守者祝公道釋其械而逸之

集本

有已

與魏志不同而此碑但云為援所執臨以白

刃不屈而已不載絳人約援事如傳所載不獨達

有德於絳人而絳人臨危能與達生死亦可謂賢

矣自古碑碣稱述功德常患過實如達與絳人德

義

集本有俱隆字

碑不應略而不著頗疑陳壽作傳

集本無此

二好奇而所得非實也松之又注魏書達年五十

五而碑云五十有四亦當以碑為正嘉祐八年十

一月十四日書 右真蹟

魏鄧艾碑 歲月未詳

右鄧艾碑考其事蹟終始卽魏

集本此字

無鄧艾碑也

艾嘗爲兗州刺史據碑云晉初嘗發兗州兵討叛
羌艾降巫者傳言授以用兵之法因以破羌兗人
神之遂爲艾立廟建碑紀其事艾於三國時爲名
將嘗有大功其姓名聞於世甚顯史與兗人皆不
應誤而艾又二名不同如此此君子所以慎於傳

疑也余謂古人艾又常通用漢書曰黎民艾安與
懲艾劓艾注皆讀爲艾豈非鄧侯名艾音艾而書
碑者從省歟後人讀史無音注乃直以爲蒿艾之
艾而流俗轉失久而訛繆遂不復正此理或然覽
者詳之熙寧壬子正月晦日六一堂書 右真蹟

吳九真太守谷府君碑 鳳皇元年四月

右谷朗者事吳爲九真太守碑無書撰人名氏其
序云府君諱朗字義先桂陽耒陽人豫章府君之

曾孫公府君之孫郎中君之子也其先出自顓頊
益爲舜虞賜姓嬴氏至於屏子封於秦谷因而氏
焉谷氏在吳不顯史傳無所見所謂豫章府君而
下三世皆莫知其名字按秦本紀非子邑於秦而
此與朗子永寧侯相碑皆爲屏子莫詳其義也治
平元年四月廿六日書

右真蹟

吳國山碑

歲月見本文

右吳國山碑者孫皓天冊元年禪於國山改元天

璽因紀其所獲瑞物刊石於山陰是歲晉咸寧元
年後五年晉遂滅吳以皓昏虐其國將亡而衆瑞
並出不可勝數後世之言祥瑞者可以鑒矣熙寧
元年中元後一日書 右真蹟

晉南鄉太守頌 泰始中

右南鄉太守司馬整 集本作晉南鄉太守頌
南鄉太守者司馬整也 按晉

書宣帝弟曰安平獻王孚孚次子曰義陽成王望
望第三子曰隨穆王整整先望卒後武帝分義陽

之隨縣封整爲王諡曰穆整以魏咸熙二年爲南
鄉太守是歲晉武受禪改元泰始泰始三年徙整
南陽而南鄉人爲整建此碑晉書地理志當魏末
荊州分屬三國而南鄉南陽皆屬魏後晉武改南
鄉爲順陽此碑今在光化軍軍卽襄州穀城縣之
陰城鎮陰城當魏晉時爲南鄉屬縣也余貶乾德
縣令時得此碑今二紀矣嘉祐八年九月二十六

日書

真蹟

晉南鄉太守碑

泰始四年

右南鄉太守碑不著書撰人名氏題曰宣威將軍南鄉太守司馬府君紀德頌碑云君諱整字孔脩太宰安平正之孫太尉義陽王之子按晉書宣帝弟曰安平獻王孚孚次子曰義陽成王望望第三子隨穆王整整先望卒後武帝分義陽之隨縣封整整爲王諡曰穆整整以太始三年自南鄉太守徙南陽而南鄉人共立此碑今在光化軍軍卽襄州穀

城縣之陰城鎮按晉志不列南鄉郡據此碑所載
縣令名氏有武陵築陽丹水陰城順陽祈六縣此
蓋南鄉郡所治也晉志但云南鄉魏時屬荊州武
帝平吳改爲順陽郡而不著順陽治所興廢屬縣
之名而獨此碑可見也又整傳但云整歷南中郎
將封清泉侯薨贈冠軍將軍亦不言其爲宣威將
軍南陽二郡守皆其所漏略也

右集本

南鄉太守碑陰

集本

右南鄉太守將吏三百五十人分爲二卷其磨滅者猶有二十餘人人皆有邑姓名字而無次序其名號有令有長有南閣祭酒門下督主簿部督郵監汀督郵部勸農五官掾文學掾營軍掾軍謀掾府門亭長主記史待事掾待事史部曲將部曲督又有賊曹功曹議曹戶曹金曹水曹科曹倉曹鎧曹左右兵曹曹皆有掾又有祭酒有史有書佐有脩行有從掾位有從史位有史有小史等魏晉之

際太守官屬之制蓋如此他書或時見一二不能
如此之備也

晉陸喈碑

歲月見本文

右晉陸喈碑喈爲宣威內史建武元年卒碑以咸
和七年立而碑後題云咸和七年歲在庚辰咸和
成帝年號也成帝以泰寧三年八月卽位是歲乙
酉明年改元咸和據曆七年當爲壬辰而此爲集本
作庚辰者繆也陸氏有二碑余家集錄皆有之據

陸禕碑後題云泰寧三年歲在乙酉與今曆合則當時曆官不應至咸和而頓爾差失然則庚辰特書碑者誤爾治平元年六月二十九日書

右真蹟

晉蘭亭脩禊序

永和九年

集本

右蘭亭脩禊序世所傳本尤多而皆不同蓋唐數家所臨也其轉相傳模失真彌遠然時時猶有可喜處豈其筆法或得其一二邪想其真蹟宜如何也哉世言真本葬在昭陵唐末之亂昭陵爲温韜

所發其所藏書畫皆剔取其裝軸金玉而棄之於
是魏晉以來諸賢墨蹟遂復流落於人間太宗皇
帝時購募所得集以爲十卷俾模傳之數以分賜
近臣今公卿家所有法帖是也然獨蘭亭真本亡
矣故不得列於法帖以傳今予所得皆人家舊所
藏者雖筆畫不同聊竝列之以見其各有所得至
於真僞優劣覽者當自擇焉其前本流俗所傳不
記其所得其二得於殿中丞王廣淵其三得於故

相王沂公家又有別本在定州民家二家各自有石較其本纖毫不異故不復錄其四得於三司蔡給事君謨世所傳本不出乎此其或尙有所未傳更俟博采

范文度模本蘭亭序

附

余嘗集錄前世遺文數千篇因得悉覽諸賢筆蹟比不識書遂稍通其學然則人之於學其可不勉哉今老矣目昏手顫雖不能揮翰而開卷臨凡便

別精麤若范君所書在余集錄實爲難得也竊幸

覽之

一作焉

爲之忘倦嘉祐七年夏五月二十八日

廬陵歐陽脩書

右真蹟

書雖列於六藝非如百工之藝也蔡君謨以書名

當世其稱范君者如此不爲誤矣滁山醉翁題

右真蹟

蹟

又

自唐末干戈之亂儒學文章掃地而盡宋興百年

之間雄文碩儒比肩而出獨字學久而不振未能

比蹤唐之

一無此字

人余每以爲恨今乃獲見范君筆

法信乎時不乏人而患知之不博不然有於中必
形於外若范君者筆迹不傳於世而獨傳其家蓋
其潛光晦德非止其書閱不傳也

右真蹟

又

與前跋相類疑是
彙本今兩存之

自唐末兵戈之亂儒學文章掃地而盡聖宋興百
餘年間雄文碩學之士相繼不絕文章之盛遂追

三代之隆獨字書之法寂寞不振未能比蹤唐室
余每以爲恨今乃獲見范君之書信乎時不乏人
而患聞見之不博也然若君之筆法宜傳於世久
闕於家蓋其潛光晦伏非獨其書之闕也

右集本

晉樂毅論

永和四年

右晉樂毅論石在故高紳學士家紳死家人初不
知惜好事者徃徃就閱或模傳其本其家遂祕藏
之漸爲難得後其子弟以其石質錢於富人而富

人家失火遂焚其石今無復有本矣益爲可惜也

後有

集本有此二字

甚妙二字吾亡友聖俞書也論與文

選所載時時不同考其文理此本爲是惜其不完

也

右真蹟

晉王獻之法帖

歲月未詳

真蹟

右王獻之法帖余嘗喜覽魏晉以來筆墨遺蹟而
想前人之高致也所謂法帖者其事率皆弔哀候
病敘睽離通訊問施於家人朋友之間不過數行

而已蓋其初非用意而逸筆餘興淋漓揮灑或妍
或醜百態橫生披卷發函爛然在目使人驟見驚
絕徐而視之其意態集本無此三字愈無窮盡故使後世
得之以爲奇翫而想見其人也至於高文大冊何
嘗用此而今人不然至或棄百事弊精疲力以學
書爲事業用此終老而窮年者是真可笑也治平
甲辰秋社日書

又

獻之帖蓋唐人所臨其筆法類顏魯公更俟識者

辨之

右真蹟

晉賢法帖

真蹟

右晉賢法帖太宗皇帝萬機之餘畱精翰墨嘗詔天下購募鍾王真蹟集爲法帖十卷模刻以賜羣臣往時故相劉公沆在長沙以官法帖鏤版遂布於人間後有尙書郎潘師旦者又擇其尤妙者別爲卷第與劉氏本竝行至余隼錄古文不敢輒以

官本參入私集遂於師旦所傳又取其尤者散入
錄中俾夫啓帙披卷者時一得之把翫欣然所以
忘勅也治平元年五月十日書

晉七賢帖

右晉七賢帖得之李丕緒少卿

真蹟無此二字

家丕緒多

藏古書然不知此爲真否七子書蹟世罕傳故錄

之 右集本

宋文帝神道碑

歲月未詳

右宋文帝神道碑云太祖文皇帝之神道凡八大
字而別無文辭惟以此爲表識爾古人刻碑

一作碑刻

正當如此而後世鐫刻功德爵里世繫惟恐不詳
然自後漢以來門生故吏多相與立碑頌德矣余
家集古所錄三代以來鍾鼎彝盤銘刻備有至後
漢以後始有碑文欲求前漢時碑碣卒不可得是
則冢墓碑自後漢以來始有也此碑無文疑非宋
世立蓋自漢以來碑文務載世德宋氏子孫未必

能超然獨見復古簡質又南朝士人氣尚卑弱字
書工者率以纖勁清媚爲佳未有偉然巨筆如此
者益疑後世所書按宋書文帝爲元兗邵所弑初
諡曰景廟號中宗孝武立改諡曰文號太祖其墓
曰長寧陵也

右真蹟

宋宗愨母夫人墓誌

歲月見本文

右宗愨母夫人墓誌不著書撰人名氏有誌無銘
其後云謹牒子孫男女次第名位婚嫁如左蓋一

時之制也按愨本傳與此誌歷官終始不同本傳云宋孝武卽位以愨爲左衛將軍累遷豫州刺史監五州諸軍使討竟陵王誕入爲左衛將軍廢帝卽位爲寧蠻校尉雍州刺史卒此誌乃大明六年作誌云爲右衛將軍監交廣二州湘州之始興冠軍將軍平越中郎將廣州刺史始遷豫州監五州軍事又爲散騎常侍左衛將軍領太子中庶子荊州大中正而傳皆略之也愨南陽涅陽人而此誌

云涅陽縣都鄉安衆里人又云寔於秣陵縣都鄉
石泉里都鄉之制前史不載

右集本

齊鎮國大銘像碑

天統三年

集本

右齊鎮國大銘像碑銘像文辭固無足取所以錄
之者欲知愚民當夷狄亂華之際事佛尤篤爾其
字畫頗異雖爲訛謬亦其傳習時有與今不同者
其錄之亦以此也

南齊海陵王墓銘

歲月未詳

右南齊海陵王墓銘長兼中書侍郎謝朓撰海陵
王昭文者文惠太子次子也初明帝鸞旣廢鬱林
王昭業而立昭文又廢爲海陵王而殺之遂自立
按謝朓傳朓當海陵王時爲驃騎諮議領記室又
掌中書郎後遷尙書吏部郎此誌題云長兼中書
侍郎而據傳朓未嘗爲中書侍郎史之闕也按南
齊書劉俊爲長兼侍中後魏臨淮王彧爲長兼御
史中尉南北史多有此名蓋

集本有長
兼者三字

當時兼官

之稱如唐檢校官之類也嘉祐八年九月十七日

書 右真蹟

梁智藏法師碑 普通三年 真蹟

右梁智藏法師碑梁湘東王蕭繹撰銘新安太守

蕭幾作敘尚書殿中郎蕭挹書世號三蕭碑法師

者姓顧氏幾挹皆稱弟子衰世之弊遂至於斯余

於集古錄而不忍遽棄者以其字畫 集本 作書 麓可佳

捨其所短取其所長斯可矣嘉祐八年五月晦日

書

陳張慧湛墓誌銘

貞觀二十三年立

右陳張慧湛墓誌銘不著書撰人名氏陳隋之間
字書之法極於精妙而文章頽壞至於鄙俚豈其
時俗弊薄士遺其本而逐其末乎予家集錄所見
頗多自開皇仁壽而後至唐高宗已前碑碣所刻
往往不減歐虞而多不著名氏如鉗耳君清德頌
或有名而其人顯如丁道護之類不可勝數也

慧湛陳人至唐太宗時始改葬爾其銘刻字畫道
勁有法翫之忘勑惜乎不知爲何人書也治平元
年四月晦日書

右真蹟

陳浮屠智永書千字文

歲月未詳

右千字文今流俗多傳此本爲浮屠智永書考其
字畫時時有筆法不類者雜於其間疑其石有亡
缺後人妄補足之雖識者覽之可以自擇然終汨
其真遂去其二百六十五字其文旣無所取而世

復多有所佳者字爾故輒去其僞者不以文不足
爲嫌也蔡君謨今世知書者猶云未能盡去也嘉

祐八年十月十八日書

右真蹟

又

梁書言武帝得王羲之所書千字命周興嗣以韻

次之今官

集本作觀

法帖有漢章帝所書百餘字其言

有海鹹河淡之類蓋前世學書者多爲此語不獨

始於羲之也

右真蹟

大代脩華嶽廟碑 歲月見本文

右大代脩華嶽廟碑按魏書文成帝興光二年三月巳亥改元爲太安故魏書興光無二年而此碑

云 集本有興光二字 二年三月甲午立者蓋立碑後六日

始改元也其曰闡皇風於五葉者自道武明元太武至於文成纔四世爾太武之弒南安王余立不踰年亦被弒不得成君 集本無此十九字 而景穆太子文成父也追尊爲帝立廟稱宗故以爲世也魏自道

武天興元年議定國號羣臣欲稱代而道武不許
乃仍稱魏自是之後無改國稱代之事今魏碑數
數有之碑石當時所刻不應妄但史失其事爾由
是言之史家闕繆可勝道哉然予於史家非長故
書之以待博學君子也嘉祐八年歲在癸卯七月

三十日書

昔在南譙自號醉翁
晚又更號六一居士

右真蹟

又

按魏書文成帝興光二年三月巳亥改元太安而

此碑書二年三月甲午立蓋立碑後六日乃改元
故碑猶得稱二年也其曰闡皇風於五葉者自道
武明元太武至於文成纔四世爾太武之弑南安
王余立不踰年亦被弑不得成君爲一世而景穆
太子文成父也追尊爲帝立廟稱恭宗故以爲世
也魏自道武天興元年議定國號羣臣欲稱代而
道武不許乃稱魏自是之後無改國稱代之事今
魏碑數數有之碑石當時所刻不應妄誤但史失

其事爾由是言之史家闕繆多矣 右真蹟

後魏孝文北巡碑

歲月見本文

右魏孝文北巡碑云太和二十一年脩省方之典
北臨舊京又云涉西河出平陽斜順唐達指遊咸
櫟路邇龍門遂紆雕軒按後魏本紀是歲正月乙
巳北巡二月次太原至平城四月幸龍門以太牢
祭夏禹遂幸長安汎渭浮河迺東歸與此碑所書
皆合也碑無題首故依本紀爲北巡碑也治平元

年三月廿二日書 右真蹟

後魏定鼎碑 歲月見本文

右魏定鼎碑景明三年建在今懷州流俗謂之定鼎碑也景明魏宣武年號也碑云定鼎遷中之十年按魏孝文以太和十七年遷都洛陽至此景明三年蓋十年矣 右集本

後魏石門銘 歲月見本文

右魏石門銘云此門蓋漢永平中所穿自晉氏南

遷斯路廢矣皇魏正始元年漢中獻地褒斜遂開
假節龍驤將軍梁秦二州刺史羊祜開創舊路詔
遣左校令賈三德共成其事起四年十月訖永平
二年正月畢功其餘文字尙完而其大略如此石
門在漢中所謂漢永平中所穿者乃明帝時司隸
校尉楊厥所開也厥自有碑述其事甚詳正始永
平皆後魏宣武年號也治平元年五月十日書

右真

蹟

後魏神龜造碑像記

歲月見本文

右神龜造碑像記魏神龜三年立余所集錄自隋

以前碑誌皆未嘗輒棄者以其時

集本無此字

有所取

於其間也然患其文辭鄙淺又多言浮屠然獨其

集本作以

字畫徃徃工妙惟後魏北齊差劣而又字法

多異不知其何從而得之遂與諸家相戾亦意其
夷狄昧於學問而所傳訛繆爾然錄之以資廣覽
也此碑字畫時時適勁尤可佳也神龜孝明年號

按魏書

集本有神龜二字

三年七月辛卯改元正光而此

碑是月十五日立不知辛卯是其月何日也當俟

治曆者推之嘉祐八年七月十一日書

右集本

東魏任城王造浮圖記

歲月見本文

右任城王造浮圖記不著其名云武定四年建武

定東魏孝靜年號也按後魏書景穆皇帝子雲雲

子澄

集本有子彛二字

相襲為任城王其後國絕不封其

去孝靜時差遠不知武定四年王任城者為誰也

治平元年八月八日書

右真蹟

東魏造石像記

歲月見本文

右東魏造石像記其碑云大魏武定七年歲次己巳武定孝靜年號也今世所行曆譜惟龔頰運曆圖與今亳州宋退相紀年通譜爲最詳而以頰所書推之武定七年歲當己巳與此碑合而武定止於八年是歲庚午東魏滅其事與東魏北齊書亦合而通譜以七年爲戊辰八年爲己巳又有九年

爲庚午而東魏滅按孝靜以後魏大統十六年滅
是歲庚午則知宋公所記甲子不繆惟武定不當
有九年而七年不得爲戊辰此其失爾蓋孝靜始
卽位改元天平盡四年而五年正月改爲元象今
通譜天平止於三年以四年爲元象蓋自元象以
後遞差一年故以武定七年爲戊辰也苟不見斯
碑則運曆圖與通譜二家得失其何以決

右集本

魏九級塔像銘

歲月見本文

真蹟

右魏九級塔像銘不見書撰人名氏蓋北齊時人所作也其年號見於文者三曰真君九年者後魏太武號也又曰武定四年者東魏孝靜號也又曰天保三年者北齊文宣號也按高洋以後周大統十六年受東魏禪是歲庚午改元天保三年壬申此碑云歲在涪灘是矣碑文淺陋蓋鄙俚之人所爲惟其字畫多異往往奇怪故錄之以備廣覽

集本

有云

治平元年三月廿三日書

北齊常山義七級碑

歲月見本文

右不著書撰人名氏文爲聲偶頗奇怪而字畫亦佳往往有古法碑云常山太守六州大都督儀同三司綦連公以天保九年造浮圖天保齊文宣年號也北齊書有綦連猛而不爲常山太守都督儀同等官不知此所謂綦連公者何人也嘉祐八年九月二十日書

右真蹟

又

右常山義七級碑不著書撰人名氏文辭聲偶而甚怪書字頗有古法其碑首題云慕容儀同翹常山石氏諸邑義七級之碑其文云常山太守六州大都督儀同三司綦連公以天保九年爲國敬造七級浮圖一區至天統中使持節都督瓜州諸軍事驃騎大將軍儀同三司瓜州刺史常山太守六州大都督頻陽縣開國子樂平縣開國男慕容樂及散騎常侍郎驃騎大將軍前給事黃門侍郎繕

州大中正食新市縣幹新除常山太守魏顯貴與
功曹石子和等增成之蓋北齊時碑也綦連公不
見其名北齊有綦連猛不爲常山太守不知此何
人而慕容樂官兼刺史太守竝封兩縣不可詳也
食縣幹入官銜蓋當時之制亦不可詳也義者衆
成之名猶若今謂義井之類也

右集本

永樂十六角題名

附出

右永樂十六角題名不著年月列名人甚多皆無

顯者莫可考究不知爲何時碑其字畫頗怪而不
精似是東魏北齊人所書十六角者庸俗所造佛
塔其後又書云造十六角鎮國大浮圖則知爲塔
矣其謂之十六角只見此碑而後魏時又有常山
義七級碑蓋當時俚俗語類皆如此治平元年八
月八日書

右真蹟

魯孔子廟碑

附出

興和二年

右魯孔子廟碑後魏北齊時書多若此筆畫不甚

佳然亦不俗而往往相類疑其一時所尙集本當
自有法又其點畫多與故錄之以備廣覽右真蹟

北齊石浮圖記

歲月見本文

右齊造石浮圖記云河清二年歲在癸未河清北
齊高湛年號也碑文鄙俚而鐫刻訛繆時時字有
完者筆畫清婉可喜故錄之又其前列題名甚多
而名特奇怪如馮戩郎馮貴買之類皆莫曉其義
若名野又伽耶者蓋出於浮圖爾自胡夷亂華以

來中國人名如此者多矣最後有馮黑太者予謂
太亦音撻意隋末有劉黑闥吳黑闥皆以此爲名者
太闥轉寫不同爾然隋去北齊不遠不知黑闥爲何等
語也

右集本

後周大像碑

大象一年

右周大像碑宇文氏之事迹無足采者惟其字畫
不俗亦有取焉翫物以忘憂者惟怪奇變態真僞
相雜使覽者自擇則可以忘倦焉故余於集古所

錄者博矣嘉祐八年六月二日書

右真蹟

不谷亦自歎為詩以志憂昔於外奇變想真跡

古風大雅新字文九之車並無以采昔斯其字畫

新風大雅新

大雅一車並無以采昔斯其字畫

語也

古風大雅新字文九之車並無以采昔斯其字畫

太閏轉異不同斷然所去北齊不惑不賦無聞悉同善

太亦音對意謂末古隨黑圓與無聞習以地為多善

六一題跋卷之四

終

太亦音對意謂末古隨黑圓與無聞習以地為多善

